

四庫全書

史部

欽定四庫全書

何文簡疏議卷六

明 何孟春 撰

申戒邊官疏

題為申戒邊官以正邦憲事據雲南等處提刑按察司
呈為查叅軍職事奉臣信牌前事依奉查開叅問軍職
一起該本司問得犯人釗保招稱大理衛太和所管操
千戶汪琮正德七年八年內節次賣放操軍何益等三
十二名認納月錢共海肥九千六百索正德九年又賣

放操軍楊定等十六名認納月錢共海肥四千八百索
人已事發持刀趕殺差人又令使女懷抱小兒攔阻後
將伊連刀捉獲審証明白省候具招詳允查得本官別
卷於正德十年叅奉都察院勘合行提至今未到一起
該分巡金滄道問得犯人楊瑋招稱正德十一年洱海
衛指揮王官將軍丁馮鐸挾私責打送監因傷患病領
出身死一起該分巡洱海道問得犯人鄒學招稱正德
十一年楚雄衛千戶許宏將原經收寄庫秋糧銀兩領

出給軍口糧外餘銀四兩八錢侵欺入已一起該整飭
金騰兵備副使劉節問得犯人楊景祥招稱正德十年
騰衝司百戶張鑑指稱鎮守內外官員名頭科收軍人
楊統等銀五十九兩四錢除送王太監外餘銀四十一
兩四錢侵欺入已一起該整飭臨安兵備副使吳便問
得犯人沈濟招稱正德十二年臨安衛千戶單文指稱
兵備官員名頭誑騙土舍普顯金鐲頭一對重十兩銀
標十五箇重五十二兩八已一起該管屯副使史良佐

問得犯人董慶元招稱大理衛千戶朱麟侵欺正德八年分秋糧銀三十九兩二錢四分五釐二絲正德九年分麥糧銀一百三十八兩六錢秋糧米二百八石五斗九升將銀三兩五錢送與掌印千戶陳忠接受入已一起該帶管分巡金滄道副使汪標問得犯人趙禮招稱大理衛指揮戴瓚將捕盜失事住支俸糧於正德十三年三月內隱情關衛開支至正德十四年四月每月盜支糧米三石共三十九石入已一起該帶管整飭瀾滄

兵備僉事周愚問得犯人金瓌招稱瀾滄衛千戶金琳
侵欺弘治十一年分馬料折銀一百五十一兩八錢六
分四釐一毫又侵欺在官贓罰銀四十兩五錢千戶楊
泰侵欺正德六年分麥糧銀二兩七分又冒支正德八
年九年軍人許義口糧共二十一石八已一起該整飭
金騰兵備副使汪標問得犯人吳奏招稱騰衝司百戶
吳泰侵欺弘治八年糴穀備邊銀四十兩弘治十三年
起至十六年分本所歲徵預防邊患稻穀共八十石五

斗弘治十七年馬料穀一百九十三石弘治十八年至
正德四年稻穀共一百一十九石正德五年六年七年十
年分預防邊患稻穀共一百一十石五斗八已一起該
管屯副使史良佐問得犯人路亨招稱楚雄衛定遠所
倉署掌印記百戶陳俸正德十四年八月內為事將印
記暗與省祭官楊福傑接管得受銀十兩八已各等情
事發拘審明白具招詳允關司將指揮王官千戶許宏
單文朱麟陳忠百戶張鑑陸續具本叅奏未示指揮戴

瓚千戶金琳楊泰百戶吳泰陳俸俱見未叅等因備呈
到臣除行該司將汪琮差人守提王官等案候提問戴
瓚等作急叅奏外臣查得弘治六年為公務事該部院
會議題准雲南軍職有犯除求索科斂誑騙恐嚇等項
輕罪悉遵舊制叅奏至日提問若人命強盜謀故人命
故禁故勘一應真犯死罪并監守自盜常人盜誑騙夷
方及上官承襲財物受財枉法各賊至滿貫者俱聽問
刑衙門備呈巡撫官處拘審明白就與追檢暫發羈候

開具實跡奏請提問發落若叅奏已到不服提問及延至三箇月上不行出官歸結并倚恃亮頑捏詞奏告或買求主使他人奏告無辜審係涉虛問擬改調邊衛及一年之上不赴官者照依逃官事例問發為民子孫襲替仍調別衛帶俸差操不許管軍管事蓋緣天下軍職官員類出恩蔭罔知國法而雲南衛所司禦設置土官地方薰染諸夷性習傲上虐下趨利忘義尤為放逸靡所不為及至犯罪被拘輒又自倚軍職不行出官或宣

揚仲訴而高坐本家或委棄職守而潛居夷域官司因
究奸惡無懲是以先年特為厲禁用戒邊官不同恒典
但前項事例弘治十三年已經革去今問刑例內不載
切照雲南去京萬里而為事聽叅職官俱仍支俸叅奏文移
上下往反動踰一年之外方得提問人不復知畏法法
不足以立威如汪琮王官戴瓚等輩久逭正刑濫縻常
祿爰自敗露以來六七年者有之四五年者有之少亦
閱參二年惠惡長奸害政非細如蒙乞勅都察院會官

計議合無查照先年題准事例再加斟酌今後雲南軍職有犯除徒流笞杖輕罪遵照舊制支俸聽叅外若雜犯死罪以上如前經草事例之所云者俱聽問刑衙門備呈撫按官處一面冠帶散拘審究明白就與追檢暫發羈候行令原衛司所住俸一面開具實跡奏請區處其或抗違不行出官延至三箇月以上者雖稱未經審究即係事情得實懼罪躲避一面行令住俸一面將干證人犯追問明白具實叅奏若叅奏已到不服提問及延至三

箇月上不出歸結并倚恃尤頑捏詞奏告或買求主使他
人奏告無辜審係涉虛亦照前例問擬改調邊衛及一
年之上不赴官者照依逃官事例一體問罪為民子孫
襲替調別衛所帶俸差操不許管軍管事敢有隱情將
男赴部替職都司該衛掌印官吏俱各叅問枉法贓罪
照例施行仍不准替如此庶厲禁復明人心有警威令
克施刁風可息緣係乞申舊例戒邊官以正邦憲事理
未敢擅便為此具本差承差親賫謹題請旨正德十五

年三月初七日

地震疏

題為地震事據雲南府安寧州申稱正德十五年二月初八日午時地震從西北方來續據本州祿豐縣申本日時地震從西北方來響向東南方去又據姚安軍民府申本日時地震從西來有聲如雷將本府公廳并軍民房屋震動俱各有損往東南去又據大理府衛各申本日巳時地震從西南來向東北去有聲震動軍民房

屋又據本府賓川州申本日時地震二次從西南來向東北去有聲又據蒙化府申本日時地從西北大震往東南七遍有聲如雷至午時又從西北震往東南一遍至亥時又從東南震往西北二遍初九日寅時又從西北震往東南二遍因震牆倒壓死民人王憲幼男一口又據蒙化衛申報日時次數相同及稱北門城樓下西北角外牆搖倒高七尺橫一丈東北城牆垛子搖倒十箇損裂二十餘箇月城垛子損裂七箇東南城牆角損

裂高一丈橫一丈六尺本衛經歷司廳屋脊搖倒一大
又據白鹽井鹽課提舉司申本月初八日巳時地震二
次從西南來震動軍民房屋初九日夜微震一次又據
鶴慶軍民府申本月初八日午時地震二次從西北來
向東南又從東南震回西北搖動公廨軍民房屋等因
各申報到臣查正德十年以來大理等處不時地震
俱經前巡撫官陸續具題去後今據前因臣聞地者陰
也法主於靜宜靜而動為陰有餘民生安土夷類屬陰

雲南地方諸夷雜處今乃頻年有此災異此民不聊生而夷甚可慮之應也推原其故蓋由臣并各該官員在今地方利有所當興者未能舉行害有亟當去者未能除革閭閻之下不免誅求之歎疆場之內常罹攘奪之虞職則未脩罪得焉贖除痛加脩省及行雲南都布按三司各行所屬府州縣衛司所大小衙門一體脩省城牆官房搖倒損裂去處行屬查照脩理人口壓死之家量為賑給務求實政以消咎徵外緣係地震事理為此

具本差承差李載親齎謹具題知正德十五年四月初九日

積年草賊疏

題為積年草賊嘯聚山林刦殺人財攻燒村寨事據整飭臨安兵備帶管分巡臨元道雲南按察司副使吳便呈奉臣信牌劄付前事正德十五年三月十九日據廣西府申准本府署府事激江府通判王鐫闌據彌勒州永白村被虜監生楊志聰弟楊志明楊志宗佃民李景

等連名狀告先年被十八寨強賊阿海虧洪等為惡敵
殺官軍志明兄因承委捕解四賊受賞後被千夫長王
仲明主縱前賊阿保阿吾等聚成伍寨吹動響器張打
旗號分領八百餘徒各執器械將煙白山曲納樂等寨
佃民阿令者覽等家人財刦虜情詞累告在官正德十
四年捕獲賊首阿保解問外本年六月內被前賊復聚
五百餘徒分為三哨將佃民阿令者比有召等二村房
屋燒燬搶去水黃牛五十餘隻并家財穀麥等項具告

州府行捕因賊勢衆無可奈何反被洪州村潛住江西人艾廷松引領阿保義男阿鮓并前賊者所者安等馬步七百餘徒各執長槍黃旗號頭分為四哨正德十五年二月初十日將本村并老悟土獠三寨圍殺燒燬房屋百十餘間因記前讎將楊志聰并妻楊氏男楊俊德楊九五姪男楊賢女桂月桂任并佃民那本者戮有死者方奴春冬奴阿定進安等十五名口虜去又將志聰弟楊志通義男楊車龍殺死楊八有來等七名射傷又

搶去楊志學楊洪李景段春阿自必五等一百餘家毛
色不等馬五十餘匹耕牛一百五十餘隻豬羊三百餘
隻口監生路引一紙并家財器皿衣服虜盡人民殺散
等情又據火莫龍村莊戶何志聰阿草阿勝李七連名
告正德十四年五等月內被十八寨強賊阿勿者特韃
希馬柰阿土木色等三次圍本村燒燬房屋一百五
十家燒死幼男女一十口虜去伯夷二十一名殺死阿
留阿尚等九名搶去牛馬豬羊一千六百有零并衣服

穀米戶絕人亡狀告本府張知府處本年十月二十九日通行申蒙兵備差委千戶馬珉帶領被害范朝宣普文得等告准明文會同本府牌差千夫長王仲明老人李有也前進十八寨撫勸強賊勢惡不容入寨各役回呈本官親詣本州會調師宗州土舍龍節千夫長自那并本州千百夫長龍泉番洪兵夫自備乾糧欲進撫捕蒙上司見賊勢惡恐致失事行令暫且停兵本官回府兵夫四散強賊愈加放肆本年二月初十日將總連牙

官莊一帶燒燬五十餘家牛馬豬羊盡行抄搶等情又據本州豐篤村民阿雙阿習等連名告稱本年二月初十日以來被法果路戰卜高頭甸黑土等寨強賊者草者擺阿寺阿草阿少阿俄阿必沙者阿方阿吐者討者黑者得阿豆阿旦赤立等七百餘人分作四哨攻打楊志聰等寨一哨將雙一寨圍困搶去馬二十八匹牛四十八隻羊一百三十六隻豬三十餘口虜去男婦泥古母厄柰黑柰卜適作番受阿旦阿鷄柰自阿魯怕訖額

乃者方阿弟等二十六名口稻穀百十餘石并家財衣
氈等情又據矣勒村生員楊璽弟楊通告稱前項月日
被十八寨強賊阿上阿吾赤普阿赤阿希者托等節將
管下普特小黑舊納勒白虐擺習初白五村人民殺散
牛羊財物盡行搶去等情又據祿克村貢生楊仁弟楊
定告稱本年三月初三日被十八寨強賊阿擺阿又等
率領馬步五百餘徒將本村圍困燒燬佃民李章等五
十家搶去馬二十七匹牛四十三隻豬羊一百餘隻口

將一村人民殺散切思十八寨強賊將法果高頭甸等寨賊首阿草阿勿阿擺等僭稱主人侍長總兵名目日每嘯聚千百餘黨倚恃山險菁深不時出沒流劫今日虜一村明日殺一寨不惟寧州通海等處地方受害現今本州所轄永白矣勒祿克等三十餘寨悉被攻燒戶絕人亡所餘無幾遺下糧差負累等情各告到府案照先節奉兵備副使吳便信牌為刼搶殺害地方等事節奉撫按衙門批詞前事牌仰本府着落掌印官會同指

揮查俊督併土舍龍節千夫長自那併各有名龍泉趙成等量起兵夫牛叢火甲親詣十八寨等處有名賊巢將有名賊首撫拘到官諭以朝廷恩威殺伐利害令其改悔將今節次各起被告強賊盡首出官原刦搶殺人口財畜照數追出賠償餘黨悉不追究省令各安生理若仍前冥頑不聽撫諭即便相度機宜設法緝捕務將真正賊賊獲解以靖地方如是賊勢衆大卒難擒捕應該作何處置作急呈來施行等因移關到職會同臨安

衛指揮查俊遵奉間續准本官關亦為前事會同牌差
在城驛驛丞郭森把事尹傑趙玘督同彌勒州土舍昂
繼先義官段紹先老人李有也等齎執撫諭印信告示
前去各寨撫拘不期賊首阿勿阿利等仍前聚衆糾同
叛逆那代漏網強賊在彼恃險逞惡趕殺差人不容入
寨回呈到職查得本府節年卷內據建水寧州阿迷等
州被害民范程林范玉魯法者哀者舊鮓矣等并本府
彌勒州民趙林楊永楊受宗阿丁余昂楊仲芳楊志明

何義等各告累被十八寨法果等寨賊首阿勿者特阿利阿草者箇等朋惡聚衆不時過界刦搶攻打村寨抄搶財富殺死人命等項重情在官詞狀難以悉開今看得十八寨草賊生發積惡年深比年累次委官招撫隨撫隨叛當時賊衆不過五七百人尚倚住寨險峻林菁深密不能撫捕至今草賊生發騎步約有三千餘徒養成大惡愈加放肆吹動響器張打旗號披帶盔甲刦殺人財攻燒村寨日甚一日被害者已為流轉之尸驚散

者俱作饑寒之鬼今附近賊巢村寨三十餘處婦女恐懼躲避深箐男子日夜執械隄防似此貽患地方荼毒生靈罪惡滔天神人共怒其賊既不聽撫在法實所難容若行巡捕官兵每處不過三五十名豈能捕獲切照兵部飛報賊情事例內開各處但有草賊生發緊急該管官司即便依律調撥官軍乘機勦捕火速差人申報如有朦朧隱蔽不即申報失誤軍機貽害地方依律從重叅究此係職等責任所在萬一前賊兇惡愈肆致有

失陷罪死何贖如蒙准申乞行副使吳便查照撫按衙門節次批詞信牌事理行令量起本府并師宗彌勒二州土舍龍節千百夫長自那龍泉義官趙深趙倫等下民兵五千名令各自備數日行糧炒麵本職會同指揮查俊督率本府經歷劉勤土官照磨高世安帶領兵夫人等前去十八寨分哨住劄撫捕但十八寨接連各州地界俱有通行道路恐賊逃遁又為費事前項量起兵夫自帶炒麵實難持久本職預借本府并彌勒州殷實

之家飯米約及三四百石行彌勒州轉委維摩州吏目郭澄督同老人把事收給暫助行糧事完之日申請還補又恐此後用盡難繼均乞定奪施行等因畫圖申詳本院看得起調兵夫動支錢糧撫捕久惡賊衆事情重大該道官未經先稟難以遙度牌仰本職作急會同分守官員親詣該府地方相機審處從長定奪如必進圍應須捕治遇險則要害所當據何以使賊不致奔逸持久則饋餉不可缺何以使賊坐致困斃夫貪功妄殺有

傷好生之德而養寇自玩重貽將來之害惟計出於萬全庶功收於一舉申內所言當預備者宜從作急處置呈奪施行奉此又奉本院劄付前事會同鎮守巡按衙門看得十八寨圖高頭黑土法果法鮮六石足卜龍潭路阿卜等村寨俱係藏賊巢穴賊所棲託非一處激江路南阿迷彌勒建水寧州等府州俱有通賊道路賊所出沒非一途前項強賊倘復撫之不聽諭之不從法在必誅兵非得已若要害無人守把寨分缺軍截遏則兵

勢不相聯絡賊徒終得邂逅臨事好謀雖無傷敗之虞
失會後期終鮮俘馘之績况坐甲以裹糧為先行師有
後鑿慮茲欲頃兵攻堅又當振廩相續劄仰本職并臨
元道守巡官會同計議應撫應勦守巡官密切差人前
去澂江路南阿迷彌勒建水寧州等府州着落各該應
捕人員率領本處兵夫於十八寨附近通賊道路預先
守把兵備仍量選調臨安等衛操守官軍動支無礙官
銀與守巡官各於廣西府并彌勒州分布住劄再加詳

度令委官王鏐等率領土流官舍起取所屬民兵直抵十八寨賊巢振揚威武昭示刑德彼若草心改圖厥角謝罪將今節次被告有名強賊送出即照先年處置衷情事理撫處施行若又再三不聽不從亦要隨變制宜相機行事明賞罰以作士氣申號令以一人心密構鄉導之人廣集奔命之士賊既天奪其魄我為師出有名彼散不得逃聚失所據浹旬之內氛祲可除如是該府申報不合機宜各官會議另有處置就便具呈飛報定奪施行奉

此卷查先為強賊聚衆白晝攻打村寨殺虜人財燒燬房屋等事奉鎮守撫按衙門批據廣西府申准知府張縉關前事行該本職會同分守左叅議羅方議照十八寨強賊恃險負固累惡不悛知府張縉申要督調官兵設法撲滅固為地方至計但訪得本官起倩兵夫已令自備行糧半月却又科派民間大家小戶約銀二千餘兩逼迫逃竄先失人心合無仍令本官再勘保無後艱重申定奪等因呈奉巡撫衙門議得安民事不專於治

盜治盜法莫先於禁貪知府張縉既酷且貪而欲驅積怨之民以臨死戰之地決難成功決致僨事批仰本職戒諭間本官自知事已難為罪亦將露於本年十一月二十九日棄任在逃該分守左叅議羅方具呈本院批仰會同本職勘報以憑叅奏等因行間正德十四年十二月初二等日正德十五年正等月日不等節奉撫按衙門批據軍民舍餘范玉杜見劉宇鄭果楊宗美王能波美白林師哄楊玘悟節李昊等節次各告并據臨安府

彌勒州臨安衛鎮撫孫鎮冠帶總旗李鉞曲江巡檢司
曲江驛羅台舊驛千戶陳瓊吏目袁棟百戶聶麟廣西
府學生員何鏞等各申呈為刦搶殺害地方等事俱批
節行巡捕指揮等官會同廣西府掌印官督併土舍千
百夫長通把人等撫捕去後今奉前因看得廣西府署
印通判王鏞申稱彌勒州管下十八寨強賊阿勿等節
年刦虜人財燒燬村寨積惡有名肆行無忌累經委官
招撫隨撫隨叛今自正德十五年正月以來仍又大肆

刦掠張打旗號殺死哨軍搶奪官馬以致失主紛紜告擾及至差人撫諭又乃恃險逞惡前來趕殺以故要行量調民兵會官緝捕似為相應其稱預借殷實之家飯米委官收給暫助行糧又恐此後用盡難繼查得臨安衛見今收貯正德十三年分支剩揭撥餘丁銀一千六十四兩五錢七分五釐正德十四年分八百一十一兩四錢一分并通海前前右右二所正德十四年分銀五百一十四兩四錢三分俱收在官係是無礙官錢可以

於內量取支用本職行令通判王鐫指揮查俊率領本府經歷劉勤土官照磨高世安等起調本府所屬民兵直抵十八寨賊巢多方脅撫其賊通澈江路南阿迷彌勒建水寧州道路遵奉牌劄先已撥差各該應捕人員率領兵夫用心守把外會同分守左叅政鄧相調撥臨安衛官軍共四百九十員名雲南右等衛協守官軍五百十員名跟隨遙振并動支臨安衛收貯正德十三年四年分支剩餘丁銀一千八百七十五兩九錢八分五

糧以備賞用於本年三月二十五日帶領自臨安起馬
前至阿迷州為因經過路道逼近賊巢整備防護民兵
至次月初一日早方到彌勒州據署印知州盧元愷巡
捕指揮查俊各稟賊黨衆盛不肯聽撫本州雖奉明文
調集兵夫一千餘名并路南州兵夫二百八十名而通
判王鐫尚在本府調兵未齊難以攻圍及審頭目人等
亦稱兵寡難進職等不敢輕舉會同審處前項強賊據
險貽患有年欲為萬全之計必須預備糧草起調元江

臨安澁江羅雄等處象馬等兵約同一萬員名呈請旗
牌人員督率前進方克有濟但事在持久非旦夕可成
職等雖已發牌前項府州令其調集聽取竊慮農務將
興或陰雨連綿兼以天道值暑瘴癘交作則又事有難
為是以只得量添附近精兵困圍脅撫欲得獻其首惡
權為一處俟有成算另行呈奪再照通判王鑄勇於捕
盜志亦可嘉但視為輕易驚動賊黨申稱調兵五千尚
未得千人決期二十五日進兵至今猶未到州以致各

職至此猝難舉事等因具呈到臣案照已經節行去後
今據前因會同鎮守雲南并金齒騰衝等處地方兼提
督銀場內官監太監史泰巡按雲南監察御史陳察議
得德莫大於好生政莫良於化惡十八寨強賊諸夷雜
種異稟殊俗死亡不弔殺掠為能先年在官累勤招撫
忘彼桀驁欲就羈縻撫使未及旋歸居民已為薦食惡
不可化非一日矣正德十年春鎮守撫按官以此奏聞
專意勦撲然賊犯賊級擒斬無幾名顆而我軍殺死百

戶一員殺死并殺傷兵夫不下百數十名事遂中止盜賊如何不肆地方如何得寧當時兵備等官叅奏提問至今方結今日虎窺內地藩籬而益深狼噬齊民膏血而無忌撫則既知不肯聽撫勦則又恐不能成功瘡切傷弓過其地者實難奮翼目觀入井當其任者忍弗動心為今之計合戒覆前以圖善後豈惟兵糧宜集尤貴將領先擇副使吳便查帶支剩餘丁銀兩未及二千相應留備軍興賞犒之費今要起調各屬象馬等兵一萬

每人一日該用糧一升五合每日該糧一百五十石以一箇月為率該用糧四千五百石二箇月則倍之應於路南彌勒寧州近十八寨州縣分屯方便支用萬兵既集軍民兵夫應於各府州縣衛所文武職官選取謀勇忠勤一二百員統率調度方稱任使兵在神速固驟發可以掩其不備事須豫立惟有備斯無患於將然今天道人事既難猝舉乘間伺時亦合早慮通判王鑄據叅政鄧相等所呈合當提究但正用人之際姑記以俟後

議除案行都布按三司行移掌印并該道守巡兵備督糧督屯官員查照逐一議處仍請鎮守衙門欽降旗牌督催土兵預備聽候相機撫捕及將在逃知府張縉科派情罪勘報另奏外緣係地方重大賊情起調兵夫動支錢糧事理為此具本差承差李載親齎謹具題知正德十五年四月初九日

禁科擾疏

題為禁止科擾以安軍民事據整飭金騰兵備雲南按

察司副使汪標呈奉臣信牌前事行該本官問得犯人董天福招係大理府太和縣民充騰衝軍民指揮使司戶房典吏本司一應公務每年揭撥餘丁出辦銀兩俱經印指揮陳廉徵收支銷正德十四年例應朝覲本年六月內蒙巡撫何都御史案驗備開吏部咨到朝覲事例行移雲南布政使司通行所屬應朝衙門土流官員應帶吏典書役皂隸人等各照今定盤纏數目出辦支給不許分外多帶一人多科一毫酒席等項悉從省草

守巡官至處嚴加訪察但不行存卹軍民故違科害者體訪得實不待告發就便叅究各道仍將按屬官吏支領應朝盤纏銀共若干已於某處動支中間有無分外科取緣由呈報等因轉行兵備官備行本司呈委指揮馮鑑帶同該吏楊一霑應朝陳廉自合於前項餘丁銀內依數支給為當不合令馮鑑楊一霑照依往年自備酒食邀請本司各所并經歷司巡司稅課司館驛等衙門指揮千百戶大使驛丞等官各以禮量助盤纏餽

贖馮鑑楊一需各得銀以足原擬盤纏之數比陳廉要
得乘機侵盜將餘丁銀內動支六十兩止將三十兩送
與馮鑑楊一需各顧夫馬應朝去訖餘銀三十兩陳廉
不合侵盜入已本年十一月內蒙兵備江副使牌行本
司查理應朝官吏盤纏銀兩陳廉不合捏稱於左等所
銀差內動支六十兩給與官四十兩吏二十兩領訖虛
情關行本司董天福在房承行明知前弊不合不行查
舉輒依書寫轉呈江副使處致蒙查出備呈本院牌行

本官將天福提解到官查審前情明白將董天福問罪
照出指揮陳廉等人贓另行等因備招具呈到臣除叅
詳合律批行將董天福依擬發落馮鑑楊一需候回日
查究外叅照雲南都指揮使司騰衝軍民指揮使司指
揮使陳廉指倚官吏應朝為由私將官銀侵盜入已事
屬違法律合提問緣係軍職未敢擅便為此具本差承
差李載親齎謹題請旨正德十五年四月初九日

議國課疏

題為議處國課以安邊民事准戶部咨該本部題雲南
清吏司案呈奉本部送戶科抄出臣等題前事會同鎮
守雲南總兵官征南將軍太子太傅黔國公沐崑巡按
雲南監察御史萬鑑公同都布按三司官查議得雲南
大理等府地方原設新興等處銀場原撥各衛軍充礦
夫採挖歲辦銀兩節因鎮守內臣差去人員採挖未免
囊橐其間以致歲辦不敷將礦夫口糧折辦又將夫丁
乾認共補課額大段一歲銀場所出不過三千有餘礦

夫口糧夫丁折辦乾認乃至二萬八千餘兩正德六年
鎮守總兵官并巡按御史奏將各場封閉免辦以紓民
困三四年間地方獲安正德九年被濶滄衛軍周達妄
行奏開旋復科擾害生侵欺弊出正德十三年撫按又
將災異感召情節建議封閉該部議擬覆題未蒙俞旨
本年鎮守太監專任提督以來查得礦夫口糧折辦銀
解布政司者先年因有麗江蒙化寧州浪穹等府州縣
連年拖欠數多抵鑄之時恐誤解京那借在庫備邊等

項銀共二萬五千餘兩湊解至今未補夫丁乾認銀解都司者遞年夫丁辦納不前官司追併緊急至於賣男鬻女破產蕩家接贖補納又被經收人員耗取侵用軍受橫征之苦國無完課之期緣雲南地方土號不毛物產最少家無宿藏米穀極貴總計一歲之賦稅僅勾一歲之供給況邊徼易動夷情靡常事變無形兵糧當預若使此地無此銀場朝廷決不以千數緡為盈縮而礦夫得各回原籍操備則得軍一萬七千四百四名口糧得

令有司收積則得糧一萬八千七百五十六石夫丁得
免乾認銀一萬三千一百餘兩以備仰事俯育則得各
遂生理恩感昊天歡騰異域然則銀場一事閉者為地
方弭害其指甚夥開者為公家營利能得幾何以事之
利害言之閉者反足為利開者適足成害以利害之多
寡言之閉者所弭之害多而所喪之利寡開者所得之
利寡而所貽之害多此前此鎮守撫按所以踵陳封閉
之奏而該部具覆力主其說蓋酌寡量多惜大畧小當

如是也臣今日敢不復為皇上言之皇上下之該部備查詳議必有以驗臣言為不誣矣或曰奉公行法惟貴得人利無小而可棄害無大而不可去臣願乞將原撥軍充礦夫一切查草各照原伍操備差使將原擬口糧亦各免派行令各府州縣量徵折色通解布政使司聽作備邊并營建官室支用將九處銀場判山窩村廣運寶泉四場先年因無礦脉除豁訖新興南安白塔白崖黃礦五場查照近規鎮守衙門行令三司掌印等官於

各府州選委廉慎勤能佐貳官場各一員管領人工採
挖沙礦辦納國課若原開峒口礦脉衰微不勾辦納聽
令查勘附近新開處所一體採挖雖難拘定額數務在
儘數納解庶上收天然自有之利下免主者取盈之害
等因題奉聖旨戶部知道欽此該戶部叅看得巡撫雲
南右副都御史何孟春所奏銀礦一事先年撫按奏准
封閉民困始甦今都御史何孟春仰荷巡撫重託靖安
地方乃其分內借曰鎮守等官會議宜開自當力主其

說若果灼見國課難完礦夫困苦亦建議免辦却乃奏要附近新開礦峒一體採挖非惟輕信人言抑且有負任使況銀礦得利甚微為害甚大若使准其所奏誠恐假託辦納弊出多端因而科擾侵欺勢所必有不能安民而反映民將來激成他變咎將誰歸宜從抄出查例執奏施行等因抄出送司案查正德六年為地震事該鎮守總兵官黔國公沐崑等會題要將雲南大理等府新興等場比照福建等處事例封閉該本部議擬題奉聖

旨准議欽此通行欽遵訖又為遵舊制復銀場以便軍民生理辦納課程禁除私竊安靖地方等事該雲南都司瀾滄衛軍丁周達節次奏稱各場封閉要行復開該戶科叅出周達送問遞回訖又為照舊採辦銀課以備國用以安地方等事該鎮守雲南太監張倫奏要備工具雇夫開礦採挖煎辦納課以安地方該本部議擬合無照舊封閉題奉聖旨是欽此又該軍丁周達令弟周進奏要復開亦該戶科叅出本部議擬照舊封閉題奉聖

旨恁每還議處了來說欽此該本部議擬仍令鎮巡等官從長會議定奪題奉聖旨礦場不必踏勘只照先年崔安等事例採辦仍着鎮巡等官梁裕等管理欽此又為災異事該巡撫雲南都御史范鏞巡按御史唐龍各題稱雲南大理等府新興等場與螳螂赤石崖賊巢相近其間夷獠因附為姦乞要仍前封閉該本部議擬行移彼處撫按衙門將正德十二年所採見在銀課照數煎辦解京正德十三年正月以後銀礦即行封閉礦夫

停草銀課免辦題奉聖旨銀課照舊開辦欽此通行欽
遵去後案呈到部看得鎮守雲南總兵官黔國公沐崑
巡撫都御史何孟春巡按監察御史萬鑑各題稱雲南
大理等府新興等場一歲銀場所出不過三千餘兩折
辦乾認乃至二萬八千餘兩要將原撥軍充礦夫一切
查草將原擬口糧亦各免派將新興等五場於各府州
選委廉能佐貳官管領人工採挖沙礦辦納國課若原
開峒口礦脉哀微不勾辦納聽令查勘附近新開處所

一體採挖一節為照雲南礦場節該本部議擬具題俱奉有前項欽依所據新興等五場既是礦脉衰微利少害多相與具奏封閉其附近新開處所原無採挖豈可創舉以開釁端既該戶科叅出前情合無候命下本部通行雲南鎮巡等官都御史何孟春等將原撥礦夫一切查草回伍操備原擬口糧亦各免派其新興等五場并新開處所一體封閉歲辦課額暫且停免待候礦脉長盛之時另行具奏定奪等因題奉聖旨是這礦場應

否開閉還着鎮巡等官查議明白來說欽此欽遵備咨
前來已行雲南都布按三司將原撥礦夫查草原擬口
糧免派及將礦場應否開閉事宜備呈鎮守巡按衙門
會呈查議去後月久未報除行催外卷查正德十三年
四月二十五日該前巡撫都御史范鏞准戶部咨為遵
舊制專督銀場事該鎮守雲南并金齒騰衝等處地方
內官監太監史泰題稱前任太監劉昶崔安等奉勅不
妨鎮守職專提督本處銀場聽其選擇武職官員管理

開辦銀課責限完解近年以來降勅太監梁裕與同總兵巡撫官公同管理議委文職開辦掣肘不堪行事乞要職專提督等因該本部議擬題奉聖旨是這開辦銀課准照劉昶崔安事例提督管理寫勅與他欽此欽遵通行外正德十四年四月二十日臣接管巡撫切惟前項銀場課額利少害多休戚事干地方興除乃臣職分撫臨之初即行查議事求其大此實宜先案會先存鎮守總兵官沐崑前巡按御史萬鑑議照所言與臣俱同

以此相與酌量亟申奏請臣並不敢輕信人言但臣彼時初到方及一月聞見惟恐欠真言語未能專決有負任使罪實難辭今會同巡按雲南監察御史陳察再查議得雲南地方原設銀場法當封閉從前撫按官員累次言之已為懇切該部累次執奉已為明備惟乞皇上睿聰剛斷一言而已彼欲開者未嘗不飾以利而啖聖心此欲閉者敢不歷陳其害而悟天意大抵銀場為利實少為害實多利纔十一害率千百而十一之利又不

全歸公家千百之害常至槩及官私判山等場弘治十二年奏除之後續有採挖九重不得知也新興等場正德九年奏開以來開出附近處所峒口名色九重亦不得盡聞也然則附近峒口數年之利臣不預其事不審以供上者幾何臣去歲會奏新開處所追論之言既往無益不復究竟根源煩瀆聰聰本年三月初八日雲南府安寧州祿豐縣大理府衛賓川州鶴慶府白鹽井提舉司俱各申報地震而近銀場地方震動尤甚臣等已

奏聞外天下近年地震之變雲南獨多雲南地方地震之變銀場尤甚實由銀礦採挖深酷有傷地脉以致陰道不寧故也變必有應患當預防今螳螂母喜龜山一帶盜賊出沒人民饑窘萬一勢激利動結構召集重貽境內大患臣等各有地方責任雖死何贖伏望皇上俯從前此撫按官所言及該部所執奏者斷在不疑早加封閉仍著於甲令不許聚斂姦徒再啟釁端使夫丁永壯城池之守銀米充倉庫之儲地方生靈不勝幸甚臣

等不勝幸甚緣奉欽依是這礦場應否開閉還著鎮巡等官查議明白來說事理未敢擅專為此具本差承差張時霖齎捧謹題請旨正德十五年七月初四日

治貪疏

題為處治貪酷官員事臣節該欽奉勅諭文武大小衙門管事官員有才不勝任妨廢政務者有肆為貪酷虐害軍民者聽爾體察得實輕則量情黜罰重則拏問如律應奏請者叅奏處治欽此欽遵臣到鎮以來於今再

歲其於地方之事敢不責已而先身又須屬吏之賢相
與共成而協理顧人才自是不齊而邊遠尤難責備臨
其上者舍短取長惟當器使在於下者圖新改舊或可
善終臣未嘗輕薦一人不敢輕論一士務久之以俟其
定於行處以考其真至於妨廢政務肆為貪酷真跡顯
著應挈問者不敢不行黜罰應奏請者若雲南布政司
等衙門布政等官許淳等近據布政司呈為預處考察
黜調官員以防姦弊事所司實秉一鑑之空而皇上已

明萬里之見矣楚雄府同知蕭澄違例擅取兵夫假差私受賄賂白鹽井鹽課提舉司提舉陳元憲詐稱應朝斂錢擅離原職回籍臣已叅奏未奉明旨廣西府知府張縉橫挑攬賊釁開而不復支持暴斂土民事發而遂自逃去該臣行查另奏外查訪得尋甸軍民府知府戴鰲在任之時衙門脩理雖有蹟而冒破之弊甚深盜賊緝拏似有功而牽攀之利無筭詞訟既行罰贖分外豈是官收錢糧常被加徵就中每多私入且納賄有黠奴

戴益以代其手而招賕又姦吏張本金以中其心因黠
奴占娶民妻而致讎其親夫馬輝斃於捶楚之下因姦
吏抽分料價而假禍於別犯任亥羊得等死於囹圄之
中及查本官自正德十三年冬給由去訖今二十箇餘
月未回其他任內賊私人命事形告訐官與彌縫方在
追求未容悉數本官不顧公座久虛水程久悞豈獨遷
延畏避或將希企陞除臣惟本官給由不即依限回任
設有寸長可取已為妨廢政務況如此之人乎任內賊

私人命告訐在官但有一事是實已見肆為貪酷況如此之夥乎彼若仍得遂其姦謀人將復何畏乎國法如蒙乞勅該部再加詢察如果與臣議合亟將本官革職為民或照考察不謹事例行令冠帶閒住另選他官來管府事仍候雲南按察司將其任內各項情節勘問施行庶政務可漸脩明兇貪亦知警懼幸甚緣係處治給由久不回任貪酷官員事理未敢擅便為此具本差承差楊岐鳳親齎謹題請旨正德十五年閏八月初一日

議剿草賊疏

題為積年草賊嘯聚山林刦殺人財攻燒村寨等事正
德十五年閏八月十四日准兵部咨為積年草賊嘯聚
山林刦殺人財攻燒村寨事該本部題該臣等會題本
部議擬本年七月初一日奉聖旨是這十八寨強賊聚
集人衆攻燒村寨刦殺人財地方十分受害吳便張縉
都著巡按御史提了問何孟春等議奏地方事情執持
兩端含糊不決好生有負委託着上緊會議停當奏來

定奪如或仍前怠玩致誤事機罪有所歸欽此又為地方賊情事該本部題該刑科都給事中劉洙具題本部議擬節該奉聖旨是這邊方賊情節年鎮巡等官因循苟且不遵成命處置欠當本當查究但俱已遷官去任了都饒他撫剿事宜已別有旨着何孟春等會議具奏欽此欽遵各咨到臣案照先今會題去後行據守巡臨元道叅政等官鄧相等呈稱本年二月二十三日該原委備禦巡捕指揮等官李遵等各選調附近軍民兵夫

跟隨各職至彌勒州添撥本州并路南州民兵各領帶
於構甸者圭山等處將招撫告示差令把事李和等齎
進曉諭各賊不容入寨又督據巡捕指揮查俊等陸續
挈獲路韃卜寨賊人一名阿旦法果寨賊人二名者柰
者寧言者龍寨有名賊首一名張七各寨有名縱賊窩
主二名王仲明楊清賊屬二名黑都等審實起解并獲
到賊牛一十一隻無主識認發州賣銀三十一兩支給
兵夫行糧四月初四等日廣西府署印通判王鑄師宗

等州土舍龍節等豆溫等鄉千夫長自那等各領帶民兵到來初九日責令通判王鑄督領前進該本官呈稱十二日至莫索甸劄營是夜瞭望法果路鞭卜寨俱有火光燭天次日發兵出哨龍節自那等兵夫自為一哨義官趙琛番洪段一青等兵夫合為一哨土舍昂繼先秦昇楊廷秀楊志明何志聰等兵夫為一哨領齋告示前進法果等寨挾撫見得各賊百十餘家燒毀不見賊人有番洪昂軒等同自那等行至路鞭卜寨等內遇見

騎步三百餘衆擁來拒敵我兵奮勇向前抵鬪各賊方
纔退遁有昂繼先秦昇何志聰等因見日晚林箐深密
不敢妄入各兵復回將高頭甸陸油木頭革三寨房屋
盡行燒燬於附近箐內搜獲賊屬二名口普的等帶回
本營十四日不料龍節自那等志在貪得見各寨不燬
不能大有所獲輒自解散逃回以致廣西彌勒路南等
處兵夫不肯前進等因具呈職等暫令本官掣兵回州
將龍節自那等行廣西府提問賊人問報外議得該府

彌勒州十八寨地方四面山大崖陡中間林密箐深又有盤江險溪急流衝遠其下上下聯絡二百餘里所聚賊徒不止三千餘人倚險負固據為虎窟膏腴田地不肩耕種惟恃夷性打劫不納公家賦稅不服官府管束鄰近臨安府所屬建水阿迷寧州通海縣澂江府所屬路南江州等州縣軍民莊戶無不被其殘害先年節經動調兵夫征勦為因巢穴廣險各賊易於藏沒調來兵夫固知彼處路徑險阨反被損傷致遺失事之累兵夫

回後復出大作譎詐多端累撫累叛無可奈何近自正德十三年三月以至於今仍又大肆兇惡動則千百為羣少亦不下三四百輩或在本州地方或過前項府州縣界甚至深入臨安府經由大路逼近府治三二十里張打旗號吹動響器劫殺人財攻燒村寨哨堡殺死官軍民兵搶奪官馬廐所不為以致寧州婆兮鄉沿至建水州大曲江豐樂等鄉阿速州部沼等處挨連盤江一帶地方上下百有餘里莽無人烟田糧地土盡生草木

人民俱各逃移糧差無從措辦其餘隣近地方各亦時
懷驚惶朝不保暮雖處太平之世猶居離亂之鄉似此
罪惡滔天神人共怒職等親詣地方差人撫諭不容入
寨進兵挾撫又行拒敵若非動調大軍勦捕將來釀成
大患殆不可言合無趁今預積糧草將正德十五年分
有司夏稅內量派折色銀兩若干解赴廣西府收貯倘
數不敷動支臨安府庫收庫臨安衛節年屯糧折色銀
兩委的當官員領齎糴買在倉收貯又行令附近建水

路南阿迷寧州通海江川州縣亦各存留稅糧本色或
將預備倉穀碾米以備守把或征進兵夫支用等因到
臣看得賊不可撫則兵決當用兵調既多則糧費益廣
惟先事而有備斯乘時而可為各官所議與本院前此
所行緣由大抵相同除批仰都布按三司查議呈奪外
會同鎮巡衙門議照前賊惡已貫盈法當誅滅但恐各
該村寨雖稱俱係賊巢中間豈無良善各該夷獍雖稱
不聽撫諭向後或知悔改查得先年節該欽奉詔書各

處強賊嘯聚為非詔書到日官司出榜許其自首有能擒捕首惡并黨類首官照例陞賞仍量給犯人財產欽此欽遵外今十八賊寨若不再為審處遽爾加兵烈火所延玉石難辨大軍所過雞犬不寧且前賊寨分地方險遠林菁深密道路崎嶇東則建水阿迷二州西則寧州婆兮村并盤江上中下三渡北則路南州毋丈矣與其壤土相接豆溫鄉竹子箐尖山小明凹梁王山龜山口等鄉村寨近年勦未盡餘賊與其唇齒相依彼知罪在

不赦天兵下臨未免先期潛遁或相窩藏或相勾引同
惡相濟實蕃有徒相應仍出榜文備開恩詔定委的當
官員齎捧親抵其地再加撫諭曲指回生之路大開宥
死之門庶冀自新得全醜類又經案行布政司備將奉
到恩詔書寫大字榜文數道責付今定委官指揮張鎧
顧浩千戶何經繆俊量帶軍兵防護張鑑顧浩前去廣
西府彌勒州着落各該土流官舍并訪取慣熟鄉導諳
曉夷語之人令其指引直抵各該村寨將榜文張掛俾

其革心向化各將寨內有名強賊送出將原殺死人命燒燬房屋照俗賠償搶虜人畜退還給主寨中賊屬取具不致再行聚衆搶劫殺人重甘死罪結狀通行繳報何經繆俊分投前去澂江等府阿迷建水師宗等州通十八寨道路地方張掛曉示豆溫鄉竹子箐尖山小明凹梁王山龜山口等鄉村寨各管鄉村千百夫長通把人等但有十八寨強賊經過逃避不許窩藏容留就便擒拏送官照例給賞等因通行去後又據豆溫鄉百夫

長阿完男沙者告稱千夫長自那賣陣致使伊父并夷民阿恕阿者馬卜沙乃阿線楊洪等七名被賊伏兵殺死并虜去盔甲鞍馬及何志聰等各告到臣看得節次賊情已往者不為不大將來者尤有可虞竊恐四月十三日之事被賊殺死兵夫虜去盔甲鞍馬未經告理不知幾何而二十三日以後至今強賊復出搶虜又不知有幾次前項賊勢猖獗如此虐燄不可復邇天誅不容無加該道守巡等官若不及今處置之際專在地方急為

調度使得消弭將來罪必有歸悔無所及又經案仰三司即行該道守巡兵備管糧管屯并統兵都司查照先次批行事理作急會議定擬某人某人分詣各處殫心竭力一一處置糧食務無匱乏之患軍兵務得布置之宜設何方畧可以撫出賊衆有何計策可以殄厥渠魁要害於何早加防守鄉導於何早加招集有罪人犯被害鄉村早加勘處等因行據都布按三司各將查議處置兵糧等項緣由具呈到臣議照兵備副使吳便等四

月內挾撫前賊領帶官民兵夫四千有餘不能得其款
服今次委官齎榜前去并守巡兵備官又復親詣住守
挾撫若亦止是前項兵夫彼賊積習兇頑必將仍前抗
拒徒延歲月有悞事機且撫不服則勦當繼糧既蓄則
兵可徵又經會同太監史泰牌差雲南左等衛所官舍
王昂等將今議定選調各府州縣衛所官軍民兵照數
揀選武定府先調民兵五百名尋甸府五百名霑益州
五百名新化州三百名羅次縣三百名嶠峨縣一百名

易門縣二百名定遠縣二百名亦佐縣一百名舊越州
土舍海潮下五百名并協守官軍雲南左衛三百二十
六員名雲南中衛三百員名曲靖衛三百六員名越州
衛五十二員名宜良所三十六員名俱令各該漢土官
舍目把人等管領跟隨左叅政鄧相副使王忠都指揮
同知方仲方畧於六月十二日起程前去各隘口住守
相兼挾撫其餘俱要置備鮮明器械在各衙門時常操
練聽候調用庶使軍威振揚首惡不容逃遁地方知警

餘黨得先解散等因通行去後續據委官雲南右前二衛指揮張鎧顧浩呈稱各職於本年六月初九日起程詣廣西府并彌勒州本月二十七日行據本州申據老人王惠王志聰等呈稱領榜前去督併百夫長龍經前進十八寨法果路戰卜高頭甸維所等村寨張掛撫諭與賊首阿勿者特等打話各賊說稱可將有職人員當我每寨上纔將現在賊牛馬匹人口退還若要有名賊首送官如今我每已盟誓了還要添人難以挈出等語

惠等再三撫諭各賊堅執前言不領榜文不聽撫諭誠恐
傷害性命只得回還等因本年七月初一日又據廣西
府經歷司呈據把事段童五李文善呈依蒙前去彌勒
州着落土舍昂繼先火頭楊義等進法果等寨撫諭各
賊勢衆不容入寨口稱將你府州官吏通把四五人當
在我們寨上我好陪贍若要挈人我每只要人多半箇
不與等語不肯領榜不聽撫諭及探得各寨強賊聚衆
為惡誠恐傷害各役只得回還等因申呈到職尤恐不

的會同廣西府署印通判吳奎牌差本府巡捕土官照磨高世安親詣十八寨覲與強賊打話撫諭若肯聽撫將阿勿等挈獻送出如仍前不服亦要從實回報去後各職親詣彌勒州公同署印激江府通判王鑄又行會差土舍昂繼先百夫長龍經義官趙林楊瑞老人李友也王仲和等齎榜前去張掛再行撫諭續據高世安呈稱督併原差老人百夫長與續差義官人等到於羊白寨令龍經村民阿歹者方進入十八寨內路戰卜等寨

與賊首阿勿者特阿俗等打話將榜文緣由撫諭當被
阿勿者特等說稱先已有二次來撫我每決不聽了衆
賊聚集吶喊要來羊白寨捉拏職等有阿歹者方走報
職等知會當被強賊隨後趕殺職等一同奔命走回等因
到職又據義官楊瑞趙林老人李友也王仲和等呈與
高世安相同看得十八寨強賊累經撫諭却乃冥頑梗
拗不容差人入寨不領榜文倚山勢為險惡聚強衆以
成羣出入刦殺全無畏懼各村人民時懷憂恐若不預

為裁度未免貽患地方等因到臣除批仰布政司行該道守
巡兵備并統兵官查照計議外又據守巡兵備統兵官叅政
鄧相等揭帖稟稱七月初十等日土舍秦昇等擒獲強賊者
速等九名口土舍祿世爵擒獲強賊者魯等四名斬獲首級
三顆獲到馬一匹署印通判王鑄等擒獲維所寨有名大賊
首阿革并餘黨一名及斬獲首級二顆報稟到臣查得別卷
為地方事正德十一年二月內准兵部咨該戶科給事中劉
洙奏前事該前巡撫雲南右副都御史王懋中會行都布

按三司并該道守巡兵備官計議呈詳去後未報該臣
查出為照本院文卷山積簿書塵委事非官吏親交三
司掌印并分守官交代不一情猶可諉兵備副使吳便
帶管分巡乃無一字照舉致臣前此失查重覆會題俱
合有罪除兵備官候事平別議該吏查提外又經會行
三司守巡兵備統兵官鄧相等拘喚齎榜入寨人員到
官查審強賊阿勿等如果節次撫諭負固執迷不肯聽
從有如指揮張鎧等所呈相應勦捕即便會同計議勦

捕日期原調聽候軍兵應否依數調用惟復量行選調
若是賊勢衆大守禦軍兵數少原調軍兵必須全調不
敷之數應否於附近土官衙門選調諸夷象馬湊用就
行議處停當具由呈奪務要謀出萬全機無一失撫勦
之後合用防護守禦等項事宜亦就查照劉給事中所
奏一一處置停當以憑具奏毋得苟且等因通行去後
續據雲南按察司呈為預處考察黜調官員以防奸弊
事該臣批仰僉事潘沐暫管臨安兵備去後又據委官

雲南左中二衛千戶何經繆俊呈稱六月十一日前到
澂江府將榜文給發張掛曉諭行據該府經歷司呈稱
查得該府河陽縣地方梁王山竹子山尖山三處先年
勦捕之後尚有賊黨阿邦革等在彼勾引十八寨強賊
出沒搶劫正德十五年四月內奉上司明文將阿邦革
奴革阿未等斬獲首級備申撫巡衙門餘賊近聞調兵
俱已赴府告納糧差安插訖本月十三日前往路南州
行至地名黃草壩哨探得哨下河內有船二隻當令哨

頭必八哥舖司俞寬等將船扛擡在哨十四日到州據
該州回稱管下小明凹大尖山竹子箐梅子箐蘆柴箐龜
山口末舊母丈矣等村先有羅雄等州邑市等縣強賊
在彼潛住與十八寨相通劫掠近聞調兵亦各赴州告
認糧差安插訖二十日前到宜良縣所地方撫諭該縣
回稱查得尖山明凹梅子箐蘆柴箐係路南州該管村寨
附近本縣四五十里俱先年及今為盜其清水塘良盜
混居等因又經備行巡捕千戶劉昂覆查去後二十八

日前到寧州撫諭據本州吏目史欽結狀內開土舍祿世爵私庄惟哈樂阿白等村與十八寨相通為盜如哈小水井二寨俱善惡相半西龍山址開北二寨俱係賊阿白寨窩藏那牙寨賊歹等哈樂寨窩藏西龍寨賊阿古等山母多寨窩藏維所高頭二寨賊納亨等阿金寨窩藏禁非木本二寨賊牛答等阿勿寨窩藏西黑村賊阿番等俱十八寨強賊見今窩藏前項寨內悉皆負固執迷不服其黑土維所西龍三寨俱係十八寨數內賊

巢等因又據臨安府經歷司申稱除行建水阿迷二州查勘徑自回報守巡兵備衙門轉呈外其豐樂大小曲江等鄉村寨鄰近盤江一帶連年節被廣西府十八寨強賊聚衆過界刦搶今蒙調兵勦捕鄉民得安緣由到職具呈守巡兵備官查勘外本職訪得寧州土舍祿世爵雖曾擒斬賊犯首級解官其十八寨強賊逃避本州地方者多見在各寨日則登山瞭望夜則宿歇架格山洞等因具呈到臣批仰分巡副使王忠即會分守并統

兵官務要根究明白回報使異日無僭賞濫刑之非庶
官府有收功責效之實去後據叅政鄧相等呈稱會議
得廣西府彌勒州管下十八寨強賊阿勿等據險恃強
嘯聚累世刦殺相繼百有餘年其鄰近臨安潯江等府
所屬建水阿迷寧州路南通海江川等州縣及本府州
構甸等處地方無不被其殘害先年敵殺官軍具奏撫
捕竟無全功養虎貽患遂至於今千百成羣健馬強兵
橫行境土刦虜焚殺殆無虛日商賈絕其往來軍民不

保生理錢糧被其縻費子女擄為囚奴逃移漸多糧差失誤邑里蕭條呻吟不絕累撫累叛莫敢誰何此盛世之所不容而必討者近奉撫鎮巡按衙門具題隨宜撫捕仍體朝廷好生之德不忍遽爾加兵案仰各職量帶官軍先行挾撫大書榜文差官曉諭令其獻出首惡陪償搶刦財物給還虜去人口免其族類更獲生全正當革心向化束手聽命却敢仍前負固不容進寨輕拒榜文及累差通事前去打話曲為開導示以王法挾以軍

威反行兇逆率衆趕殺執迷不反近該通判王鑄罕獲賊首阿革解官阿勿等仍敢揚言報讎擁衆攻城以致地方人心驚疑震恐若不決彰國法早為殄除何以警示諸夷消弭後患但賊勢強大巢穴廣險功難速成糧餉必須多積軍民兵夫夷兵象馬必須俱調方可舉事大約軍馬糧餉齊集雨水瘴癘亦消聽候明文刻期進剿如其首惡就擒餘黨投首亦就撫處然後班師事平之後應該更置防禦事宜另行呈議庶進兵無苟且之為

而成功有永久之計再照寧州等處土舍祿世爵等窩藏強賊稔惡不悛亦合議處以消後變等因到臣行據都布按三司掌印官都指揮使劉宗仁左布政使方璘按察使陳洪謨等呈稱前項強賊猖獗肆行刦殺無厭每當撫諭負固執迷既欲趕殺委官且又揚言報讎全違人道蔑視天刑極惡窮兇人怨神怒况奉欽依事理得預撫勦機宜及今剪除勢不容緩添兵益糧相應查照原議處置其餘事情似難定執俱候臨期相機行事

等因備呈前來俱經會行外今准前因除備咨內題奉
欽依事理通行欽遵外會同鎮守雲南并金齒騰衝等
處地方兼提督銀場內官監太監史泰巡按雲南監察
御史陳察議得天地之化由肅殺以成歲功帝王之道
以威武而輔文德義存禁暴情豈佳兵廣西府彌勒州
十八寨強賊阿勿等不受所司約束不供本等糧差聚
衆即刀槍自隨出山即搶殺為事遠近地方被其蹂躪
往來道路為之阻塞胎禍階亂閱世積年暴戾恣睢呌

器揮突惡罔不極罪無有加臣等特念蠢爾蠻夷類同禽獸仰思皇上招攜懷遠之意俯顧微臣保境安民之心不敢為不教而殺之誅故常盡先撫後勦之慮彼羅雄舊越州邑市縣等處解散之衆幸自各從安挿得保生全則此寨中冥頑之徒既堅不聽懷徠豈容曲宥使復虎貽反噬疽成內食決為剿計良適其時其他別卷元亮亡命窩主今方誘之效順安其反側若懷異志又在臨期或當破竹之餘自有壓卵之勢所貴三軍司命得

人為先將領得人戎務可濟左叅政鄧相副使王忠僉
事潘沐都指揮方仲方畧經營之久者已閱三月奔走
之勞者常環數州形諸文移頗有成算臣泰近因鎮守
缺總兵官已故黔國公沐崑原領印信符驗旗牌俱付
收貯相應固守會城慎防叵測臣孟春少埃催督糧足
兵齊相應親詣軍前調度區處為此除再申明案仰三
司轉行各官通行附近賊巢各該軍衛有司等衙門先
將賊人緊關要路江口差撥官兵人等用心守把如有

船隻即便撤去晝夜哨瞭毋容逃出仍曉諭鄰境鄉村
夷民使知只將十八寨法果等寨勦捕其調到官兵俱
已戒飭必不擾害各無驚疑若遇賊人逃出經過能就
捉獲送官一體給賞若勢重難擒即便星飛報知該地
方把路等項官兵追捕毋得黨助為惡因親縱放受財
隱藏或妄挈平人自取重罪一面移文調取先次定擬
各府州縣衛所揀選聽調官軍民兵武定府民兵三千
名尋甸府二千名元江府一千名景東府一千名蒙化

府五百名鶴慶府五百名霑益州二千五百名姚州二
千名北勝州七百名鄧川州五百名劍川州五百名安
寧州二百名鎮南州三百名馬隆州三百名順州三百
名南安州二百名大姚縣一千名亦佐縣四百名嶧峨
縣四百名雲南縣四百名廣通縣三百名雲南在城右
前後廣四衛官軍共七百員名六涼衛一百八十員名
越州衛一百員名楊林宜良二所各一百員名安寧易
門二所各五十員名各委土漢官指揮千百戶同知知

州知縣土舍人負張鎧等并高鳳等各管領俱該僉事
周愚督率於東西北府州縣地方進入會同各官分為
三哨一哨左叅政鄧相都指揮方仲由路南州拖白村
進入一哨副使王忠都指揮方畧由彌勒州火莫龍村
進入一哨僉事潘沐帥指揮馬昇等由寧州婆兮村進
入仍嚴戒飭不許擾害經過處所及鄰近賊巢鄉村亦
不許於中途退遯不進剿捕之時若獲原被虜良人男
女俱要送官審實給主與有功者一例給賞如有違法

并貪功故殺良善及透漏消息賣放正賊臨陣不行齊力奮勇畏縮退避不聽調度輕率妄動致悞事機者定依軍法從事三司領兵官員查照施行若各路所統官兵有不勾用者作急具呈定奪仍先籌畫萬全之計布置停當刻期並進直擣巢穴務在一舉克捷首惡無遺黨類悉殄以安地方人民若官軍人等獲有功次就便驗實給賞記錄事完繳報凡百進止機宜并案驗該載不盡者悉聽各官臨事之際隨宜應變而行尤須審察

下情協同商議俾兵不徒勞糧無虛費功成之日自有公論毋得偏執已見不詢衆情坐視違延重貽後患不便守巡官仍查前項附近撫處過賊寨地方若無窩藏容隱尤惡有名強賊不必按捕若又中變助惡與法果等寨一體施行其合用糧餉并隨營賞功銀兩等物布政司掌印官并右叅政晁必登作急措置支給外查得臣秦節該欽奉勅諭內開凡有軍機夷情等事須與總兵官及巡撫巡按三司等官計議而行欽此臣孟春節該欽

奉勅諭內開但有賊寇生發即會同鎮守總兵等官同心計議量調官軍設法撫捕毋令滋蔓欽此欽遵及會同巡按雲南監察御史陳察叅照外切緣前項盜賊已經兵部題奉成命隨宜撫剿及查弘治十三年剿捕竹子箐正德二年剿捕豆溫鄉七年剿捕安南長官司賊人俱係一面剿捕一面具奏蓋以雲南至為險遠去神京則萬里離外國纔數程地迥天高苦封章之難達風吹草動慮仇虜之易聞近日鎮守既缺總兵先年巡撫

實兼軍務今非昔比事與勢違臣等竊惟皇上責臣等以
執持兩端含糊不決欲臣等知惟斷乃成之功諭臣等以
奏來定奪又曰如或仍前怠玩致誤事機罪有所歸欲
臣等知不從中制之義臣孟春職專統御主謀弗臧
實負萬罪緣係動調官軍勦捕盜賊事理未敢擅便為
此具本差承差李如松齎捧謹具題知正德十五年閏
八月十七日

何文簡疏議卷六

欽定四庫全書

史部

何文簡疏議卷七

詳校官子監司業_臣納麟寶

編修_臣裴謙覆勘

總校官庶吉士_臣何思鈞

校對官中書_臣李荃

謄錄監生_臣馮士新

欽定四庫全書

何文簡疏議卷七

明 何孟春 撰

地方疏

題為地方事准兵部咨該本部題內開大同宣府并雲南等處各該巡撫官員今歲俱免赴京議事若有益於政體便於軍民應議事件明白條陳差人齎奏會官計議奏請定奪其所奏事件務要直言簡易不許虛飾繁文亦不許將應該自處瑣細尋常事情一槩混奏等因

題奉聖旨是欽此欽遵備咨前來切念臣本以庸愚濫膺巡撫去離僕從越在裔夷耳聞目擊應該自處者常圖效於萬分而心計手籌不敢自專者實願據於一得顧臨茲地忽已三年查得撫屬地方十有二事質彼僉謀斷於已見係干應議事件相應明白條陳用是虛繁不飾簡易以聞伏望皇上軫念遐荒特勅該部會議施行雖政體不能深益而軍民亦頗皆便臣不勝拳拳緣係地方事理為此開坐具本差承差楊金齋捧謹題請

旨

計開

一查得鶴慶軍民府洪武初領州六劔川蘭順北
勝浪蕓永寧當時土官掌印必須叅以流官地
方廣遠所以官皆全設後十七年改蘭州屬麗
江二十九年改北勝浪蕓永寧隸瀾滄本府止
轄劔順二州兩州賦役全無供億劔川州止納
知府馬夫一名其餘柴薪等項俱派本府一十

三里出備且府官并首領共八員錢糧詞訟知府管理有餘守禦二所屯糧只須通判督理餘官俱無可理之事又地極邊方每選一官至任俸資柴薪不得時給往往貧乏難存而民間送故迎新却又不得勝勞擾以此官民至今常告不便行據布按二司分守分巡官會呈要將本府止設知府通判經歷并見在土官知事共四員其同知推官照磨檢校四員盡行裁革庶使官

無冗濫民可甦息等因臣惟前項府分領地既狹於前設官宜減於舊今事簡官多民疲差重若將所議同知推官照磨檢校裁革以省員冗以蘇民困揆之事體委的相應

一查得鶴慶軍民府與劍川州相去山路一程中間清水江巡檢司額設官吏二員名弓兵五十名緣衙門在深陡山箐中四圍俱是夷賊之藪先年巡檢并妻曾被殺死吏兵不敢守住衙門

歷久倒塌止存空基官吏至今在府寄住不過
虛糜俸祿本州額設弓兵數多隨解隨逃文移
往返歲無虛日官府為其攪擾人民被其負累
後來被劫者困無衙門責任地方又每告害臨
近守哨之人描陪贓物以此百夫隊長土軍人
等只得備用年例穀麥顧募本府宣化關羅羅
守把保障一帶山路商賈始通而巡司竟為虛
設行據布按二司分守分巡官會呈要將本巡

司衙門弓兵裁革官吏起送別補印信繳部行
委本府能幹官就將附近宣化關等處羅羅召
集起取二三十家前來本司地方居住保障防
禦彼處山地任其開墾自種自食免其一應差
徭供口不及者將原額弓兵該免丁糧量追分
給庶使羅羅弓兵土軍人等各肯樂從地方無
慮等因臣惟前項府分清水江巡司設置賊藪
不能存立而雇募附近羅羅乃能防禦此見以

夷治夷之足恃也若使其人就彼居食復聽其
開耕山地以自給又令原額弓兵各照優免丁
糧量出工食以為資助益足堅其樂利之心而
惟我約束之聽誠於地方有益巡司官吏一向
寄住本府既不能盡職業裁革起送揆之事體
委的相應

一查得大理府賓川州係弘治年間添設故赤石
崖里各巢夷民版籍雖屬賓川州而赤石崖巡

檢司仍屬雲南縣夷民因此不服所在巡司鈐
束及神摩洞蔓神寨白羊市金沙江巡檢司衙
門亦皆在未設賓川州之先各司俱屬趙州北
勝州雲南縣太和縣等衙門統屬後蒙添設該
州各司係隔別衙門秦越相視不服差調以此
年中遇賊過往常至失機誤事不便行據布按
二司分守分巡官會呈要將各司改隸賓川州
統屬庶使臨時便於調用有事可以責成等因

臣惟前項府分伍巡檢司皆在通賊要路而賓川州乃賊出必犯之地手足須衛頭目身手須運臂指不有所制不能相使今賓川既設州治則治境之內衙門宜歸統屬若將五巡司俱隸附近該州以便調用揆之事體委的相應

一查得大理府浪穹縣所屬十二關巡檢司設在萬山之中四圍俱係夷羅賊巢路通浪滄盜賊不時出沒洪武初設有土官巡檢張護李積二

員掌印巡捕後各為事病故子孫衰微今止李
積之後土舍一人護管印信公事久已廢弛及
照縣屬鳳羽鄉上下江嘴箭桿場師并順澧等
巡檢司俱有土官亦設流官惟獨十二關未除
流官以此掌印缺員捕盜無所責成行據布按
二司分守分巡官會呈要將前司添設流官巡
檢一員掌印土舍李伯琳巡捕盜賊庶使公事
易完盜賊少息等因臣惟前項府分該縣巡司

土官既不能襲職土舍一人不能辦事若照鳳羽鄉各巡司添設流官就將前清水江裁革官員於此掌印此間土舍專一責成巡捕揆之事體委的相應

一查得大理府地方盜賊最難緝捕者莫如鐵索箐赤石崖等處其巢穴甚多地方甚濶山溪甚險然道理俱相連絡迤南鐵索箐等九村屬姚安府居中禾頭等村屬雲南縣迤北赤石崖等

處屬賓川州地險民夷教化難及且各巢素皆
結為親黨出則彼此相應其鋒莫敵入則散居
巢穴其蹤難追若不責成各該捕盜土官以靖
地方各地方雖有一二哨堡三兩巡司何濟於
事及照雲南縣一處原有土官二員新設賓川
州原無土官行據布按二司分守分巡官會呈
要將雲南縣土官楊訓調任賓川州官為起蓋
房屋安置家小於州城中赤石崖亦為修造衙

門令其在彼督捕盜賊彼中居民里甲徭役錢糧就委徵收解州磨石舊附近賓川州多係楊訓莊戶凡賓川州盜賊俱委楊訓督捕姚安府地方專任本府土官同知高鳳督捕雲南縣地方專任本縣土舍張太清督捕各分界至各地方有賊各任其咎庶使督捕無缺責成有歸等因臣惟前項府分地方捕盜本是土官之責知盜賊之虛實諳地方之險易莫如土官近年土

官敢於視賊為患縱賊分贓者一以責任之未專一亦以駕馭之未盡其術爾若將高鳳楊訓張太清等照依所擬調遣於各地方責成督捕揆之事體委的相應

一查得大理府雲南縣楚場巡檢司與十二長官司衙門並置一處先因已故土官副長官李應宗闌懶不肯住守衙門常年偷安於你甸彌陀莊等處住居衙門徒設於彼以致賊人劫搶過

往人財內外鹽路不通夷民因無生理往往糾
賊刼搶歲無虛月行據布按二司分守分巡官
會呈要將長官司遷移一泡江之西孔全橋新
哨添修改為本官衙門領手下兵夫二百名照
舊免差自備糧食住守在彼地方專一守把賊
人不令出沒及將赤石崖巡檢司遷於東南俄
打喇只宜之間著落土舍張太清督令附近村
分開通赤石崖直抵孔全橋經行轎馬官道疏

通鹽路西出徐甸北至力角庶使夷民得以運
鹽生理夷情便利既有生理自不為盜等因臣
惟前項府分楚場地方設有巡檢足任詰捕之
責若移彼處十二長官司於一泡江之西以遏
賊衝又移赤石崖巡司於俄打喇只苴之間以
據要害又由此開路直抵孔全橋以通官道又
開路西出徐甸北至力角以便貨利揆之事體
委的相應

一查得大理府雲南縣徐甸巡檢司設在平川無
益捕盜距東五里許石沈江自羗浪十字官道
之間乃賊必出之路行據布按二司分守分巡
官會呈要將前巡司遷立於石沈江自羗浪十
字路間守把庶使要害有防奸細可遏等因臣
惟前項府分所在地方密爾東小廟山與磨石
舊小尖山力角之東三處俱臨賊巢山高路險
箐深林密賊常於彼窺伺往來官道為之阻絕

若將巡司移遷於彼撥之事體委的相應

一查得臨安府石屏州寶秀鐵冶所額設大使一員攢典一名冶戶二十四戶額辦鐵課一萬七千三百九十四斤至正德七年本府因見歲貯鐵斤數多支用數少申蒙巡撫衙門准行本府行令本所委官估計折納每鐵一百斤計價銀二錢八分共價四十八兩七錢三釐二毫遞年冶戶辦納本府貯庫緣所設一官月支食米一

石一年計米一十二石折色米每月二石折肥
鈔不等一年該銀六兩有零一歲之間官俸如
此歲以計歲所費不貲而歲納課程未五十兩
以一官一吏之設董四十餘兩之課是輸於官
者少所耗於官者多得不償失居然可知行據
布按二司分守分巡官會呈要將前衙門裁革
原課於該州帶管徵辦庶使食不冗而事亦集
等因臣惟前項府分該所課鐵納銀數入不多

而官攢俸糧歲積不少若行裁革止令該州帶
管徵辦揆之事體委的相應

一查得蒙化府地方與順寧府臨境交接其蒲夷
因無巡司守把得以自由遞年過界搶殺本府
地方人民已非一日順寧蒙化隔界先年雖設
一備溪江巡檢司把截緣本巡司立在荒山峰
頂無益於事行據布按二司分守分巡官會呈
要將備溪江巡檢司遷移本江江口把截過渡

盤詰姦細庶使前司不為徒設而蒲夷亦知少
警等因臣惟前項府分鄰境見今互有申告過
界搶殺情節備溪江口正其過渡處所若將前
巡司自彼移此揆之事體委的相應

一查得武定軍民府元時已曾建學及後土官弄
積妻商勝知本府事學校始廢國初天兵南下
商勝出糧餉軍仍襲土官知府儒學之事當時
上司於彼婦女固不以責望之今承平日久雲

南文教大行與中國等本府離會城不過二程
府中街市居多漢人土軍下屯寄種夷民相接
言語漸變應襲土官頗知書史佐屬俱是流官
所轄州縣僉人子弟多務讀書五七年間有入
附雲南府學者有入昆陽州學者父兄耳聞目
擊皆有願教子弟之心其子弟皆有願學之志
行據布按二司分守分巡官會呈要將本府東
嶽廟改為文廟梓潼祠為明倫堂令應襲土官

與各流官協謀規畫一應當備解舍門宇查取
所轄和曲等州縣出附別府州縣學生員回府
肄業仍擇選二州一縣俊秀子弟以就師資各
免其家雜泛差役就為奏請建立學校衙門設
官督教庶使夷俗丕變實效克臻等因臣惟前
項府分密邇會城風聲氣習本不相異較之元
江等府外夷荒郡則大不同先年本府土官跋
扈無忌使原有學校重漸教化未應至此今元

江府已設有學豈可使會城二程外地反為不
教之夷今應襲土官既頗知書史所轄二州一
縣又多俊秀子弟開導趨向規畫處置事皆極
易無難若與建立學校衙門設官督教授之事
體委的相應

一查得潯江府潞南州民和鄉離州一百五十餘
里相去兩日之程我朝舊立為邑市縣雖裁減
衙門而地里寬廣人民稠密錢糧遞年完納課

程並無拖欠弘治四年新任知縣陶鉞以邑小
為嫌捏故申奉巡撫衙門奏准歸併本州歷年
既久民夷離州隔遠遂不復知官法日漸變為
頑梗先時該州差人前去勾攝公務猶以財買
囑冀其回護今則習染成風公然不出且至於
拒捕及擅自起兵讐殺官司皆莫能禁將來未
必不以一隅之地而貽鄰境之憂行據布按二
司分守分巡官會呈要將本鄉奏請照舊立縣

其鄉街市坊廂公廳基址猶是舊日縣規但舍
宇曾被拆去起蓋哨房今要從新起蓋緣本鄉
依山近水樹木取用方便磚瓦灰石易於燒般
所欠木匠工食亦費不多鄉民聞復立縣無不
鼓舞自願出辦不必動支官錢若恐官吏員役
費用查得本府新興州三里知州吏目各一員
潞南州里分亦不過三里只合設知州吏目各
一員且路南州先係土官知州改立流官同知

一員以鎮佐之今土官既易應將同知革去移此俸資柴薪以給知縣餘止增添典史柴薪俸資亦不過因往昔舊規彼處之民未嘗以是為擾如此庶使遠近均有統屬夷民日就規矩地方可無後患等因臣惟前項府分所有屬縣既近年之廢反成有害則今日之復不當憚難況地不改闢民不改聚人心思舊衆口同詞若依所擬准令將邑市縣復立就將本鄉開墾田地

生聚人民分立里甲裁革潞南州同知俸資柴薪移與知縣惟少典史吏典等項之費就於本鄉稅糧內編派支給使小民應役適宜糧差出產有地而上下皆得其便揆之事體委的相應一查得廣南府維摩寶山一州俱係烟瘴極邊衙門選來知府知州佐貳官員多不赴彼到任只在會城或在臨安地方暫住聽候上司差遣今前府分屬州流官知府知州各一員選來尚且

無事可理若再有佐貳官員安所置之又查得雲南左右中前後廣陸衛衙門設在會城歲計共該夏秋稅糧約有一十一萬有零其屯田散在附近潯江新興嵩明晉寧昆陽安寧昆明江川陽宗易門三泊富民羅次呈貢歸化河陽祿豐等府州縣地方先年設有屯倉例該委官前去收受因無原設文職監理其事只得於各衛指揮千百戶內選委徵收奈何近年以來不才

軍職奉公守法者百無一二致將錢糧擅收折
色入於私家任意花費及至事發監追却乃甘
受刑憲坐待死期見今監禁有至五六年者八
九年者甚至一二十年者不能完官無可奈何
行據都布按三司掌印并督糧督屯官會呈將
廣南府通判一員維摩寶山二州同知各一員
量行裁革於會城雲南府除本府舊有管理有
司稅糧通判外仍再添設管理屯糧通判一員

監同雲南左等陸衛管屯指揮千百戶等官專
收各衛夏秋屯糧其外衛司所屯糧臨期三司
掌印督糧督屯官會同選委附近文職監收先
前所委收糧指揮千百戶一切革除庶使官不
濫而廩祿可省事得專而奸弊可祛等因臣惟
前項府分州司官員到任既無地土候差常閱
歲時苟不假以署權彼何異於待缺必須暫為
委用亦少得其盡心若依所擬量行裁革移其

俸資柴薪以為添設管理屯糧官員之費揆之事體委的相應正德十六年五月十七日

防禦疏

題為防禦地方事臣聞養雞者不畜狸牧獸者不育豺為政莫急於安民安民莫先於除盜然官不得人民何以安人無專責盜亦難除切照雲南去天遠於萬里為地雜處諸夷深山大澤實生龍蛇盜賊之患所在非一如東路彌勒州賊首阿勿等害益州賊黨折苴等臣已

會同鎮巡官具奏征勦及隨宜撫捕外其迤西一帶如大理府賓川州之赤石崖螳螂古底等處雲南縣之石沈江上七村等處姚安府之鐵索菁稗子溝等處俱是盜賊巢穴山高菁深聯絡二百餘里頻出剽搶來去不常事聞調兵撲捕率皆遁散事後掣兵回還旋復嘯聚經年累歲隄備實難昔時議者謂地方曠野官司隔遠未易號召所致欲於趙州迷度市巡檢司添設一縣以控馭之又因編戶數少民力弗堪而止臣訪得該州所

轄定西嶺驛與洱海衛白崖川城堡相連村居稠密在古為龍佑那肇基建治之所古鐵柱尚存川原平行我朝撥大理蒙化景東洱海四衛屯田在彼并本州九里民雜居約有六十餘村西抵飛來寺計七十里東抵金雞廟計一百一十里大抵前項盜賊出有三路從東出者自馬喇提外居左往金雞廟及姚安地方過英武關小孤山刼搶并鎮南州回首便道搶白崖川而歸從西出者自力角雞坪闖向北刼搶鄧川州羅陋向南過飛

來寺往蒙化地方亦或過白崖川刼搶而歸從中出者
自磨石舊過梁王山入白崖川流刼或東或西而歸而
此地適均為盜賊出入中路近嘗建哨添兵選委指揮
等官統領資以居中鈐制本為得地奈何軍職望輕士
鮮用命中間貪婪者多陰受賂賂害滋甚臣節次案
行布按二司該道守巡官員查勘處置先後回報皆謂
不若於大理府添設捕盜通判或同知一員將本處青
龍鋪改設府館令其常川住劄假與權柄西自趙州東

至鎮南州及姚安府賓川州雲南縣所屬土官巡司哨堡悉聽鈐制糾察土官姦弊兼理軍民詞訟一應弭盜安民事宜聽其以漸脩舉呈請合于上司詳奪仍於賊出三路附近左右相度風水完聚去處築立堡城起蓋營房調取各衛土軍民兵每處兼撥二百名每名照舊月給行糧四斗五升聽其調度分委軍職土官管領守把其飛來寺抵沙橋二百里內沿途仍俱密置烟墩就撥各哨兵夫哨瞭如飛來寺賊出各墩烽火接放則中

路東路軍兵一齊策應或截於前或追於後東路中路賊出亦復如是失機不行策應者聽其叅治務使軍兵首尾相援盜賊腹背受敵兵威既振賊勢自沮迤西一帶患害或可少弭臣反復熟籌再三博訪各官所論事體頗宜伏望皇上軫念邊遐特勅該部議而行之臣又察彼盜賊雖產夷獮亦皆人類類有土官為其主宰審地里之險易與盜賊之虛實又須責成土官如姚安府地方則土官府同知高鳳州同知高椿賓川州則土官

知縣楊訓雲南縣則土舍張太清宜令各照界至往來
督捕若姚安地方有賊就著落高鳳高椿追襲務得真
正賊人解報如或不獲行拘該管通把監禁若土官陰
與交通代為隱蔽許令添捕盜官從實叅究處治至於
賓川州雲南縣亦然則官得其人而事權不致於渙散
人專其責而盜賊自可以潛消矣臣地方之寄有在不
任拳拳惟聖明留意幸甚緣係請乞添設捕盜官員防
禦地方事理未敢擅便為此具本差承差楊金親齎謹

題請旨正德十六年五月十七日

乞復學校疏

題為陳悃乞恩脩復學校設官降印便育人材以圖補
報事據雲南按察司帶管提督學校按察使陳洪謨呈
奉臣案驗准總司關前事依奉催據金齒司經歷司呈
行據永平縣申查得本縣與永平禦前前右右二所肘
腋相連官舍軍餘俱寄民戶糧差事同一體生員見有
已成材趙完等六名未成材阮邸等七名俱附寄本司

儒學讀書相隔路途二百餘里委的寫遠往返供送艱
難以致人心厭倦士氣沮撓民間俊秀子弟在城及關
廂社學生徒據軍民杜閏等連名狀報各有男杜檣張
紳等四十二名頗堪教養願報入學及查本城原設有
文廟一所正殿塑像俱全春秋祭祀不缺兩廡明倫堂
兩齋牆垣完備止是櫺星門并公廨未曾起蓋基址見
存本縣原係產木地方易於脩理所費不過工食之資
查得本縣贓罰贖罪及聽解麥糧銀共二百二十兩有

零可以動支其齋膳門庫就於本縣九里均徭民戶內
僉編其廩祿於本縣秋糧合屬官吏歲支餘剩米四百
石內關給其俸鈔於二所歲辦酒醋徵收課程銀一十
一兩三錢內給用人情事體俱各相應及據永平禦前
前右右二所各申軍餘數少差撥不敷欲不遵依開設
學校風化所關等情回報前來會同雲南布按二司守
巡金滄道左叅政鄧相副使汪標議得永平縣與永平
禦設立一處軍民雜居該禦止有二所軍丁不過千餘

該縣雖編九里人民多係阿昌蒲羅不通漢語文化難
入兼以路當衝要人少差繁先年因有縣治雖建文廟
致祭而門戶解宇等項俱未創造蓋因人材不足不堪
建學以故中止今本縣典史楊麗金奏要比照通海呈
貢等縣設立儒學一節詳據該司回文事惟欲速成不
為後慮查得永平生員附寄金齒司一學止有一十三
名其餘社學子弟率皆頑童稚子不過勉強湊數而已
即目俱不堪教養人才尚未衆盛豈宜輒便立學徒事

糜費設使強與建學未免要補廩增額數本地無人金
齒城中士人貪圖食廩應貢必皆爭先冒籍應考充補
況張官置吏齋膳之費門庫之役俱仰給於縣所是以
窮薄軍民之財賦反供異鄉富庶之士民不惟事理不
順亦恐人心不平及照本司儒學人才較之往昔頗盛
規模可比一府原設官止訓導一員一遇事故缺官掌
印未免權用齋長生員護守生徒衆多教業廢弛而永
平生員赴金齒學肄業者道路實有二百餘里往來供

給委有不便彼謂人心厭倦士氣沮撓或亦有之合無
轉為奏請將金齒司儒學比照各府添設教授一員掌
印其永平生員不必赴金齒學肄業舊設訓導行令分
教本學諸生并往來永平提調彼處生員其永平原原有
官地亦與起造齋膳號房隨有廩膳若干許令分出膳
夫銀兩常川在學會膳講讀及彼處社學生亦令一體
考課凡遇春秋祭祀師生同縣官從宜行禮而人材亦
可隨地作養等因具呈到臣案照先准本院咨准禮部

咨該金齒軍民指揮使司永平縣應朝典吏楊麗金奏
前事該本部看得所奏合行雲南撫按衙門督同提學
守巡該道等官查勘該縣生員有無衆多附寄本司儒
學讀書是否道路寫遠備查明白如果人情事體相應
立學將該用錢糧等項計議停當具奏施行若是不堪
立學徑自立案等因到臣已經案行查勘去後今據前
因會同巡按御史羅王議照黨庠術序先王造士興賢
之地家誦巷歌有國化民成俗之務為之有漸期於用

夏以變夷教之有方尤貴篤近而舉遠今金齒司儒學
既人材頗盛則師訓不可缺員永平縣地方既徒衆不
多則學校難於遽設中間委曲誠又有如提學并該道
守巡官所云者相應斟酌處置如蒙皇上軫念邊遐特
勅該部再加議處合無准於金齒司添設教授一員掌
管印信舊設訓導分教本學諸生中有永平附寄生員
免其遠赴肄業令分教官往來提調并社學生一體考
課講解其餘事宜悉依今勘所擬施行積之年久如果

教養有成人材漸發戶口繁增財力寬裕堪以專立一學再行奏請庶幾此日官不乏教士得安居而異時學非徒建財無浪費臣除行該司聽候施行外緣係督同提學守巡該道等官查勘事理未敢擅便為此具本差承差楊金親齎謹題請旨正德十六年五月十七日

陳言疏

題為陳言乞重天命以興聖治事臣聞國運當興天命

攸眷帝心簡在衆誠所歸皇帝陛下興聖於南維配天
於北極藩邦之號表於徵兆莫之為而為歷數之傳形
於誕敷莫之致而致陛下應符而出躬受天命蓋自知
所重踐阼以來心存聖治固宜思所以興之矣臣限守
炎荒遙瞻魏闕草茅耿耿不勝至愚竊伏私計今當數
月在廷羣臣自元老以至庶寮幸際清明共圖傾竭事
之是非政之得失官之臧否民之休戚罔不畢陳法令
之斟酌紀綱之董正人才之進退威福之流布弊革害

除壅祛滯滌忠明佞白賞信罰必維其時矣臣愚竊計今日羣臣之所陳者心有萬慮口有萬言萬慮至深萬言至富其條件不可勝計其科名各有指及臣外遠莫由與聞然大較知其所願惟在陛下脩德勤政始終不間而已脩德者勤政之本勤政者脩德之發脩德勤政非有二事所謂脩德者宋呂公著告其君曰人主即位之始當正始以正天下脩德以安百姓脩德莫先於學人主之所當學者觀古聖人之所以用心論歷代帝王

所以興亡治亂之迹求立政立事之要講愛民利物之術自然日就月將德及天下書曰王人求多聞時惟建事又曰念終始典于學厥德脩罔覺傳說之告高宗不過如此揚雄曰學之為王者事其已久矣堯舜禹湯文武汲汲夫學者所以學治天下王者之事也故自堯舜禹湯文武之為君皆汲汲於學後世繼體守成之主生而驕逸忘其祖宗創業之艱難徒見天下無事以為禍亂無從而生或荒耽於酒或盤於遊畋或窮奢極侈小

而喪身大而亡國皆由不能以學脩德故也夫學以脩德而政事由此立焉是脩德者勤政之本也所謂勤政者司馬光告其君曰人主初即位正四海延頸企踵屬望之時若深執謙遜端拱不言羣臣奏事不加處斷中外之情能無鬱悒易曰聖人作而萬物覩又曰帝出乎震相見乎離志不可慢時不可失不回視反聽無以新隆平之基不改絃易轍無以拯頽靡之勢今近而畿甸遠而海隅之民注想維新如饑如渴須亟有以慰之百

凡執事中君子小人情各不同窺測深淺相為勝負事
又有當蚤慮者詩曰弗躬弗親庶民弗信弗問弗仕勿
罔君子言人主勤政無有遠近幽深悉知其事物如此
而後能治天下若有行弗躬有事弗親雖有盛德民何
取信弗能問以盡其事弗能察以盡其物則小人得以
勿罔君子矣庶民弗信則不能安民矣勿罔君子則不
能知人矣不能知人何以求治人主不患無高世之資
而患無求治之意不患無求治之意而患無好學之實

脩德在於好學求治在於勤政是勤政者脩德之發也
欲進是道無他亦惟在乎知人與急親賢而已孔子曰
舜有臣五人而天下治孟子曰堯以不得舜為己憂舜
以不得禹臯陶為己憂古之帝王先務為急程頤告其
君曰人主大率一日之中接賢士大夫之時多親寺人
宮女之時少則自然氣質變化德性成就商之高宗舊
勞於外及為天子不敢荒寧享國長久為後王法周之
成王年十有三而即帝位起居言動必謹後世守成之

主莫有及焉高宗學於甘盤而傳說為之相成王以召
公為之保周公為之師故其德昌隆而政休美陛下起
自外藩如商高宗春秋鼎盛如周成王在朝士大夫素
未相接文華講學當選天下儒碩於今方始既深居九
重遠於萬里若復顯邛淵默日益嚴重則自賢自聖上
之乏涵養薰陶之功下之無周旋輔導之助外之幽僻
之民銜冤失職者何由上聞疎賤之臣懷材蘊德者何
由自達臣愚伏願陛下追法帝王舊典紹復祖宗故事

未明求衣辨色視朝日御經筵無分寒暑或退朝便殿
推擇二三大臣及諸侍從更召迭進與之從容辯議古
今治體人間情偽使各盡其胸臆所懷至於文武班寮
凡有職業應進見者亦必命之使前降以溫顏假以長
畧親加詢訪委曲詳悉使下情上通無所壅蔽又得知
其人志趣所向器資所任而加銓定焉其有經術通明
有守不畏魁磊淳茂耆艾之士及諸博通今古史傳智
謀超卓可以參廟謨斷國論者陛下置之優閒引之禁

近使得專意討論以備朝夕召見紬繹顧問密勿獻替
務俾縉紳有道巖穴篤行之儒毋遠於朝毋遺於野如
程頤所言經筵既罷常留二人直日夜則一人直宿祇
候非時宣召資其啓沃其有事故請假者須與以次官
互換輪直則羣臣間將皆有一言可裨時政將皆有一
善可答君恩將皆得分陛下憂勤之寄將皆得副朝廷
委用之誠不敢偷安苟祿養望待遷而陛下得開益聰
明漸摩道義為商高宗中興殷世為周成王專美姬室

德不期脩而自脩政不期勤而自勤矣或曰陛下昉臨
大寶一日二日萬幾晝既研觀書史夜須省覽章疏究
隱微於未形極思慮之不到而又欲與大臣從官廷款
酬對日昃夜分猶將弗給恐非頤養神明之道竊以為
不然為國有體勤政有要政有本末事有細鉅察目睫
者不能見百步察百步者不能見目睫舉其綱則萬目
張挈其領則衆毛理陛下誠脩德勤政知人而親賢臣
下之賢者登之不肖者斥之其材能之堪某事者就任

使之有功者必賞有罪者必誅已先得其體要先得其
本與其鉅者自然躬不勞而日有暇於講學矣若夫簿
書煩冗文法碎密較量金穀割析毫釐乃百官庶寮之
所司大明會典內開載列聖累朝品式格例甚悉陛下
遇有以此言此事陳者第令各該衙門檢括看詳斟酌
俾當取決施行雖勿留意蓋無不可古人云習與智長
化與心成又云少成若天性習慣如自然為可為於可
為之時正賴今日臣所謂重天命以興聖治不越乎是

惟陛下裁察臣無任瞻戀拳拳之至為此具本差承差
施廷秀親齋謹題請旨正德十六年六月十三日

公折俸疏

題為公折俸以勸小官事臣聞子路曰負重致遠不擇
地而休家貧親老不擇祿而仕不擇祿而仕者孟子所
謂仕非為貧也而有時乎為貧謂夫居卑者也易曰天
地養萬物聖人養賢以及萬民解者謂養民則必須賢
故先養賢養賢則必須祿祿厚然後可以責廉隅安職

業故中庸論九經其一為體羣臣體羣臣則士之報禮
重忠信重祿所以勸士也方今宦途官之小者本為祿
仕苟折俸太薄無以為俯仰資人品不齊所學所志豈
能皆自信而固守國家欲其不受贓物不罹憲網難矣
雲南遠方地窳民夷水路不通非他處比府佐并州縣
官俱缺養馬丁夫府衛州縣首領各儒學及驛遞巡司
倉場所庫務局等官位卑祿薄至者多係以例告遠及
不得已貧老之人攜挾妻子去離鄉闕萬里驅馳經歲

始至末流雜職既鮮隸卒又無馬匹甚至無址可棲至則就賃房屋揭借柴米舉家懸望折俸為生延及季終具告支取該管衙門舊每視為泛常過期不與致使房吏索錢不得使用不為稟給此等小官在任窮極或將子女結婚富室以圖借貸或將衣服典賣他人以為盤費臨事之際豈不知畏刑憲而侵盜官錢受取贓物祇顧燒眉且圖糊口事敗跡著監追配發罪非不當情實可哀其餘不幸疾病死喪柩尸暴露妻子流離者有之

幸獲任滿又因力不能歸寄藉州縣終身抱丘首之恨
者有之臣撫臨以來耳聞目擊不一而足應該為彼清
究處置情節略已施行外近為會計糧儲事行據雲南
布政司備將所屬大小文職官員月支俸糧造冊呈繳
到臣查得布政司等衙門大小文職官員月支俸糧除
本色米及折海肥米外其鈔米布按二司雲南府昆明
縣官都司并在鎮城陸衛首領官每石價銀二錢八分
五釐大理臨安鶴慶姚安武定蒙化等府劍川州官每

石一錢三分三釐楚雄曲靖尋甸澂江廣西鎮沅廣南
永寧順寧等府新化北勝等州官并所屬州縣各該衙
門官安寧五井黑鹽白鹽提舉司官與雲南府大理等
府所屬安寧等州呈貢等縣各該衙門官每石一分六
釐所支名目雖同所得分數不一臣惟俸每石同折宜
一也今重者每石二錢八分五釐或一錢三分三釐輕
者一分六釐鈔每貫同價宜一也今重者每貫一分四
釐二毫或六釐六毫輕則八毫重輕厚薄懸絕如此八

品九品官不在鎮城衙門每月除本色米一石外肥鈔
米銀止共得二兩一兩未入流官每月止共得三錢五
分七釐此等官員何以度日饑窘迫切何以保全終始
此非我祖宗欽定折俸之通制非古聖人之所以養賢所
以勸士之常道也或謂末流雜職儒學官外少由科貢
多出吏胥幾何足養幾何足勸臣竊以為官無崇卑並
膺朝命職有高下並是國家臣子分職領事不可或無命
服既加似難弗恤古之治天下者一夫不獲猶為已責

而況與有職業相須為治之人乎今者伏遇皇帝陛下
維新庶政大賚四方膏澤所施朽枯同被凡與出身咸
思革面正竭涓埃願輸海嶽之時如蒙聖恩察臣此言
特詢該部備查先年雲南并各布政司大小文職折俸
輕重厚薄事例叅量斟酌將雲南遠方選到末流雜職
官員折俸鈔米或照本處何項等第或照他處若干分
數稍從其厚各適厥中使小官有實惠可霑外郡與鎮
城無異兩廣貴州等處各布政司小官折俸有差池者

照此查議擘畫施行庶幾上天雨露之仁獲同於一視
下土螻蟻之職克效於萬分而秉節持斧之使臣當其
有事亦得以責成遇其有罪亦得以盡法矣其於政體
不為無補緣係乞明事例公折俸以勸小官事理未敢
擅便為此具本差承差施廷秀親齎謹題請旨正德十
六年六月十六日

辭俸廕疏

奏為乞恩辭免俸廕事正德十六年七月初一日准兵

部咨為捷音事該本部題該臣等會題本部議得雲南十八寨蠻賊阿寺等憑藉深山大菁穴惡僭稱王號連年劫殺人財騷擾地方本部先因都給事中劉洙論奏議行鎮巡等官勸議撫勦數年之間迄無成功都御史何孟春等奉命督勵文武官員部領土漢官軍分道並進設奇取勝元惡授首餘黨削平此皆皇上聖武神威布昭遐邇之所致也所據巡撫都御史何孟春鎮守太監史泰經略周悉兵糧皆足戰守咸備致此克捷論具

功蹟實為之最巡按御史陳察協心調度紀驗詳明功
亦可尚叅政鄧相副使王忠都指揮方仲方略俱有領
兵督戰之功叅政晁必登僉事周愚俱有監軍督餉之
勞僉事潘洙都指揮劉璽布政使方璘按察使陳洪謨
都指揮劉宗仁各能隨事効勞贊襄戎事以上各官功
俱可錄合無查照近年平賊陞賞事例何孟春史泰各
加祿蔭陳察量加陞用鄧相王忠等各量陞俸級潘洙
劉璽等各量加賞賚及照都給事中劉洙先事建議得

平強寇以靖地方功亦難泯等因正德十六年三月初
二日題奉聖旨是史泰歲加祿米十二石何孟春陞俸
一級還各蔭子姪一人做百戶劉洙先事建議致有成
功與陳察并鄧相王忠晁必登周愚方仲方略各陞俸
一級潘洙劉璽方璘等各賞銀五兩紵絲一表裡欽此
欽遵通行外所據應蔭子姪緣無姓名職役合咨前去
煩照本部題奉欽依內事理將應蔭弟男子姪姓名咨
報以憑上請蔭授等因到臣聞命驚惶罔知攸措竊惟

地方之事皆臣職分之所當為盜賊克平非臣智力之
所能致乃蒙先皇帝俯從該部查照近年各該地方平
賊陞賞事例濫及臣等臣自揣有何功勞敢同各處恩
錫伏望皇上容臣辭免使臣不致踰涯越分速戾招尤
臣無任感戴天恩之至為此激切具本差承差張雲親
齎謹具奏聞伏候勅旨正德十六年七月初三日

閉銀場第二疏

題為乞查原奏早閉銀場蠲國課以安民生事正德十

四年五月內該臣會同鎮守雲南總兵官黔國公沐崑
巡按雲南監察御史萬鎡公同都布按三司官查議得
雲南大理等府新興等處銀場節因鎮守內臣差去人
員採挖未免囊橐其間以致歲辦不敷將礦夫口糧折
辦又將夫丁乾認共補課額大約一歲銀場所出不及
五分之一礦夫口糧夫丁折辦乾認乃至十分七八正
德六年總兵等官奏將各場封閉免辦地方始獲少安
正德九年被瀾滄衛軍妄行奏開旋復科擾害生侵欺

弊出正德十三年鎮守太監具奏領勅職專提督以來
歲必取盈礦夫口糧折辦銀布政司因麗江蒙化等府
遞年拖欠恐誤解京那偕在庫備邊銀共二萬五千餘
兩奏解至今未補夫丁乾認銀都司遞年追併緊急將
各土軍賣男鬻女接湊補納又被經收人員耗取侵用
軍受橫征之苦國無完課之期要將軍充礦夫一切查
革各照原伍操備差使口糧亦各免派行令各府州縣
量徵折色解布政司備邊其銀場照舊封閉等因該戶

部題奉先皇帝聖旨是這礦場應否開閉還著鎮巡等
官查議明白來說欽此欽遵移咨前來已行雲南都布
按三司將礦夫查革口糧免派及將銀場各呈鎮守巡
按衙門會呈查議去後未報節行催外正德十五年七
月內臣又會同巡按雲南監察御史陳察再查議得雲
南地方銀場法當封閉從前撫按官員累次言之已為
懇切該部執奏已為明備大抵銀場為利實少為害實
多利纔十一害率千百而十一之利又不全歸公家千

百之害常至槩及官私判山等場弘治十二年奏除之
後續有採挖九重不得知也新興等場正德九年奏開
附近處所峒口名色九重亦不得盡聞也附近峒口數
年之利巡撫等官不預其事不審以供上者幾何臣等
去歲會奏新開處所乃是追論之言既往無益不煩更
悉本年三月初八等日雲南大理等府州縣各申報地
震而近銀場地方震動尤甚實由場礦採挖深酷有傷
地脈陰道不寧所致相應早加封閉不許姦徒再啓釁

端使夫丁永壯城池之守銀米永充倉庫之儲等因具
題至今未奉明旨臣謹再會同接管巡按雲南監察御
史羅玉議得前項銀場在先鎮巡等官議開議閉甲可
乙否素不相合蓋鎮守太監係原奏開之人今日難於
會議臣等原奏封閉之事始終決不苟同議開者方託
以利欲炎上心議閉者歷陳其害冀悟天意言之矛盾
固有由然今既伏遇皇帝陛下鼎命初凝離明普照先
朝庶政絃轍維新積歲奏章旣囊無滯銀場之當早封

閉特在陛下查出原奏一言決矣陛下踐阼之餘儉德
形於詔旨仁聲溢於羣聽富有四海豈以千萬緡為贏
縮況沒籍罪人財產萬萬於茲望乞早降綸音著于令
甲將前銀場永遠封閉地方生靈不勝大幸緣係乞查
原奏以安民生事理未敢擅便為此具本差承差張雲
親齎謹題請旨正德十六年七月初三日

裁革冗員疏

題為裁革內外冗員守臣復設府治撫安夷民以消地

方大變事卷查先為巡撫地方事據雲南布政司呈奉
臣批據前整飭金騰兵備雲南按察司副使劉節呈奉
臣案驗前事行准接管兵備副使汪標牒呈到司會同
都按二司查議相同等因具呈到臣會同巡按雲南監
察御史羅玉巡按雲貴監察御史席書議得天下事消
變於未萌者策之上消變於將萌者策之中變成而後
救斯無策矣臣切見雲南地方俱有諸夷然西至大理
東至臨安皆是府衛相叅事體有定規賦役有常制故

民雖未富猶得麤安惟金齒一司實古之哀牢郡漢之永昌府考自元以上皆為府治其後元務遠略創立大理金齒等處宣慰使司都元帥府於銀生崖甸其地在伯夷蒙樂山下去金齒司南一千餘里其夷沒後金箱二齒而葬故因得名與永昌府絕無干涉後元因其地不可守改為金齒衛移入永昌府共治元末道梗流官多缺止有土官通判在任聖朝洪武十五年於指揮王真處降附十六年春附近諸夷忿王真立衛鎮守不恤

府事乃共推已退土官高公引麓川思可發夷兵數萬來攻生擒王真盡夷其城而去本年十月雲南指揮李觀請復立永昌府金齒衛招撫安輯十七年閏十月朝廷降到永昌府印又續發南京及各處軍萬名充實軍伍府衛相叅軍民安堵二十二年十二月李觀病故後指揮胡淵以舊城夷毀改築新城因欲自尊假以民少糧不及俸為名於二十三年十二月初八日奏革永昌府改衛為金齒軍民指揮使司兼管軍民彼時淵以築

城有功意在專制自便又以指揮俱長單掌印例無考
選軍政可使世世專有此土却將永昌一府之民併入
永昌金齒二千戶所尚有附府良民無歸編立東西太
和陸軍等里徑屬本衛原本衛所屬施甸等縣續立鎮
夷等州俱革為長官司百夫長等衙門惟永平一縣乃
古博南縣民不可革遂檄隸指揮司統屬彼時淵恃其
功不欲與府頡頏訖得成其私計然親承屠城之慘深
結夷民之心故需索少而糧差之額輕軍民和而調發

之事簡又以府衛所有專供一司故夷民皆安財用頗足後來承之儘意貪剝近城寨分已不如前其後因麓川反叛加以征調夷民漸困及景泰末都督毛勝因隨麓川知金齒司指揮供給最厚遂營幹鎮守有內臣見得毛勝獲利監承黎義等亦行接踵前來廣占夷民之田以為官莊大取夷民之財以供諸費邊夷自此始不聊生然名目尚少猶可支持相承到今日增月長典馬典軍誅求萬計磕頭見面動要數千過江錢子粒錢聽

事錢家火錢差馬錢馬草錢馬料錢油刷錢椒鹽錢料
絲燈錢進貢弩手錢下京盤纏錢龍杠錢無時得了白
米戶馬料戶麥子戶柿餅戶香筍戶酒米戶雞墪戶牛
皮戶柴薪戶無日不徵加以跟役小人百樣生事害人
光棍牢子一時縱橫取索椎髓剝肉倡言不恤夷民畏
死莫敢不從由是強者出為盜賊弱者逃入外夷如近
城鳳溪一長官司今止數家二代不襲可見矣較之宣
德正統之間環城百里之夷民十亡八九比之成化弘

治之始二三百里之夷民亦減六七所不能逃者赤身裸體食草鋤山氣息奄奄死亡無數而上下交征略不為異如施甸夷民害極欲變正德十年三月城門為之晝閉騰衝軍士逼於拜見正德十一年太監居宅曾被攻圍及今木邦起兵奪占孟定府又起兵入隴川臨芒市又起兵入灣甸州其州去永昌老徭寨僅四十里孟養又起兵過金沙江鑿山開道由茶山直抵騰衝孟密又敢要求宣慰遞到緬書有佺侍長差劉京官來拜見

等語臣訪於地方官吏耆老言自討平麓川之後今經八十餘年並無夷人如此侵犯良由金騰二司軍官不才又恃鎮守內臣將官陰為主張附近夷民被害不過各逃往彼處以訴其怨彼各得招懷以益其強既知二司之虛憊又悉二司之貪殘而內外守臣且又年年下番哄誘寶石月月設計欺騙金銀遂使遠夷生凌侮之心興兵試作變之漸若不早為處置誠恐大變即興蓋附近夷民為二司藩籬今皆抱恨切骨則藩籬撤矣附

郭軍民為地方根本今皆疾首痛心則根本病矣藩籬根本皆墮大變固應不遠臣叨受巡撫之寄憂如焚灼坐在氊針博采廣詢共言會城既有鎮守雲南并金齒騰衝地方太監金騰地方又有鎮守太監會城既有鎮守雲南總兵金騰地方又有鎮守叅將一處兩人政體固有未便官多民擾下情誠有未堪先年金騰鎮守罷設不常祗緣舊制所無並係冗員之數今者夷民甚是艱苦邊事又多釁藥鎮守官員不比其他文職就使全

無漁獵終亦供給煩難無之不見其為少有之益見其為害得省一日則民得一日之寬得省一年則民受一年之賜今日為金騰計惟是裁革前項鎮守內臣將官裁革之後仍復府治以撫安之則內患可除外變自息臣以此言考諸前十數年巡撫等官固有憂先於臣具本凡二三次陳奏者矣緣該部只照常行雲南鎮守衙門勘報殊不思鎮守衙門太監與同類為一心總兵與叅將為一體為鎮守者於近夷日取之財必千必萬於

遠夷歲通之利莫考莫稽既圖利身誰肯為國一承行
勘轉加唬嚇設言治其妄告倒說為伊解釋各差官於
各寨逼要乞留鎮守保狀不願復府甘結更令科派備
禮磕頭所以夷民則畏懼益深蓄怨益切二司則剝削
愈肆聲勢愈張非徒無益於弭亂適乃促發其禍機今
幸皇上承大統聖鑒昭升率土普天更新視聽延頸
企踵想望太平用敢罄竭愚誠冀消變故臣近節該伏
覲登極明詔內開正德元年以來傳陞乞陞大小官職

盡行裁革各邊但係正德年間新添分守守備內臣詔書到日即便回京分守守備內臣將官有正德元年以後改作鎮守等項名色兵部查奏改正欽此前項鎮守金騰太監叅將應在裁革及即便回京并查奏改正之例如蒙乞勅兵部早賜施行其復設府治一事尤願聖明俯垂睿鑒不惑羣議斷自宸衷下之戶部備查前後撫巡奏詞所以不會鎮守之故以審事情免行鎮守衙門勘報致成掣肘之難反貽患禍將金齒司所屬永昌

金齒二千戶所夷民并附郭各里百姓仍舊復立永昌軍民府統治再乞勅吏部精選四川湖廣貴州有守有為進士出身知府一員舉人出身通判一員推官一員經歷司經歷一員照磨所照磨一員司獄司司獄一員令其領印作急前來到任其所割隸州縣長官司及合屬衙門俱俟知府到日計度人民戶籍多寡地里遠近照舊為州為縣為長官等司另行奏請銓官降印其騰衝司亦原係府治後改為騰越州騰衝守禦千戶所彼

時州隸永昌府所隸金齒衛後為比照金齒改為軍民
指揮使司今其為害亦與金齒相同若金齒復為府衛
騰衝亦合復為州或為縣將司改為衛土軍土民相叅
管理其大小事例亦比金齒次第舉行若其公堂廨宇
臣已訪得二處空閑地方房屋甚多鎮守內臣將官去
後各該官至自可不勞而備如此則近便夷民自可得
安遠地夷心自然畏服而大變之不可救者可坐而消
矣然不止潛消禍變於將來又可廣垂利澤於永久臣

請略節陳之原兩司皆是指揮千百戶等官凡經收錢糧皆先取以阿奉權勢因而竊入私家盡行花費及至盤查則認借充盤隨復竊出花費事發之後監追至死無處賠納為此守巡官無法可治將金騰官銀多解大理府庫收貯今復府治則免寄大理既可省五日護送又可以答應緊急其利一也又凡承委撫夷勘問詞訟徵收錢糧各一事不知一字不識凡地方詞訟錢糧不能辦集今復府治則承委有人諸事易辦其利二也又

所轄永平以文職縣治為軍衛統屬人情不便且又設有學校生徒彼提調官乃一蠢然武夫豈能作興士類今復府治則府縣相承有司體統各得其宜金齒司學仍為府學士類亦各有所觀感其利三也又驛課巡司缺官不報各買求署掌見今館驛日日折乾二兩而供應在外稅課徵商倍常而課程尚虧災異常見而不敢申呈吏員久役而不欲起送今復府治則官無虛曠館驛可蘇稅課可減商賈可通災異可警吏役可正其利

四也凡元宵烟火料絲燈皆於操處出銀五十兩製造永昌所却又通行科派夷寨春牛芒神天下同制今要多造兩頭承奉分派夷民各壇祭祀惟衣冠與祭有胙今要賣補二倍分送跟官光棍牢子人等今復府治則此費亦得斷絕其利五也又金齒無魚利比之大理不及然東湖各塘壩河池所出市不缺賣南北河道竹木之來歲不缺入而魚課之徵抽分之利通入私門今復府治則財用自足其利六也往時官舍軍民之家有不


得已乘喪嫁娶者皆在夜中惟恐人覺目今指揮等官
稟過官府任行嫁娶或父母喪後三五日或半年白晝
婚娶鼓樂喧闐誇示市廛衆皆欣慕納賄請求以為榮
耀人心全泯風俗盡移今復府治則此弊可無風俗還
舊其利七也夫復設府治能消禍變之大創永久之利
如此然十數年前巡撫等官言之無益鎮守衙門勘報
竟格不行其事可知臣今幸遇聖明登極庶政維新千
載一時機不可失三年於此慮已至深倘又畏首畏尾

不一陳之豈不上辜於責任下負於地方哉臣猶恐欲專地方之權以取利幸地方之變以激功者曲加沮撓臣請逐件折之若曰永昌府係太祖高皇帝時所革只當遵守不宜更復則胡淵革府之時府學亦革為足食倉矣何自正統以來列聖又因臣下之請復照府學事例立學到今乎若曰金騰地接外夷規畫已定忽復府治恐兵弱不能控守則見今臨安接界於安南比之諸夷之離金齒尤近安南地盡於南海比之各夷之宣慰更

強臨安因有府衛足制強大之安南而金齒不然正由
司治貪污每起其欲變耳今以永昌府衛相叅又加騰
衝外護有不能控制數宣慰司窮遠之夷乎若曰民少
不勾僉一府之阜隸門庫糧少不勾供一府之官員俸
糧則查今革去鎮守衙門隱占白米戶之丁力足勾一
時之阜隸門庫私納白米之石數足勾一時官員之俸
糧矣何況三十寨之秋糧各里民之賦役乎若曰未嘗
有例緩求其宜則見今雲南大理蒙化景東楚雄臨安

曲靖俱有府有衛卽其例矣且內惟臨安大理二府上地民戶財產田畝與金騰相等其餘府分遠不能及況今夷民困極大變將興救焚拯溺少或遲延則禍患必作噬臍無及豈容緩乎其餘區處細微事務曲折非本內所能悉者臣已悉與布按二司官晝夜計算經畫傳當決可弭大患於將萌垂利澤於永久如或一有不效臣敢萬死以謝妄言輕舉之罪伏望聖恩憫念民生久罹荼毒無處控訴洞察民情將成禍患尚可消弭速施

剛斷俯賜允從則地方幸甚生民幸甚臣等幸甚緣係
裁革守臣復設府治撫安夷民以消地方大變事理未
敢擅便為此具本差承差郭景文親齎謹題請旨正德
十六年八月 日



何文簡疏議卷七